



林屋民風卷之七

古吳洞庭王維德編輯

男


其龍其章

錄

長樂郡振錄西諸子也

民風

震澤編云湖中諸山地屬吳而與吳亦或有不同吳城之俗文也而山人近於陋吳城之俗奢也而山人近於嗇陋似質嗇似儉質與儉君子其亦有取乎具區志云諸山風俗去古未遠獨東山近時則不然富者以貲相高鮮衣精饌峻宇雕牆疊石鑿池以供娛樂多游手健訟之輩女子則靚妝絃服燒香游玩愛聽梨園凡婚喪以至燕集務矜華褥信鬼神好淫祀袁宏道游記云民



木犀月 卷十
競刀錐俗鮮風雅是也二書所載皆言東山大槩子以
西山事特爲論次俾採風者悉覽焉

教子

夫生子不教家之索矣然訓導又必自少時始吾山之
最可風者方其少時概不與之銀錢恐其私買食物開
其嗜慾之端也倘有私財必究其所自來恐其非分之
獲也其防微杜漸如此且子弟弱冠而不能業儒者卽
付以小本經營使知物力艱難迨其諳練習熟然後付
託親朋率之商販則子弟之迫於飢寒者鮮矣

兄弟

吾山兄弟衆多者農工商賈量才習業所得錢財悉歸
公所並無私蓄間有才能短拙不諳生理者必待其有
子成立始以家產均分並無偏私此風比戶皆然也

維德

幼時族中有兄弟爭產者邀集族黨至家廟議時
先君子正方公爲族長向其兄弟云倘外人欺凌汝子
而奪汝子之產以與已子汝意何如今汝等爭奪不過
自爲子若孫計乃欺汝父之子以富已之子汝父安乎
否乎汝等自問可乎不可乎彼兄弟皆感泣而釋自後
傳聞一山以爲兄弟爭產之戒云

婦女

婦女惟主中饋足不出中門言不聞闔外縱骨肉至親未嘗輕出相見如丈夫出外則門戶事宜皆託親族長者料理婦女總不與焉至于燒香觀劇從未有是

聯姻

山中著姓世爲伉儷故其子女賢愚無不悉知所重相女配夫未嘗嫌貧擇富媒妁一言欣然相就卽寸絲片茶遂爲聘幣並無門戶錯配之患亦無遠嫁離山之女

嫁娶

凡婚嫁惟以質樸爲主所以財禮妝奩概不討論也而及冠及笄無不咏桃夭之什古人云必待資妝豐備何

如嫁不失時吾山得之矣

就婚入贅因家貧子壯不得已之事耳吾山雖極貧人從來無有蓋閨幃嚴謹恐使異姓雜處也

媒妁

媒妁本非謀利之道故親族之友契者爲兩姓執柯謝媒花紅之說概未之聞至于請庚傳帖皆媪僕奔走謂之媒使因隨意犒勞則有之矣

喪葬

喪葬之禮尤從朴實蓋雖不以天下儉其親亦決不忍爲觀美而久暴親棺也總之貧富不等各盡其力不使

化者有風露之悲

慶弔

慶弔之禮但量已力之能否不論儀物之厚薄故雖百文亦相餽贈

酒席

歲時伏臘杯酒往來苟非親族等夷之人不得預于座間貧富非所論也所用殺饌卽冠婚宴會不過雞豕魚蝦而已珍饈異饌概非所尚

山間筵席大概卜晝長夜宴飲廳堂演劇概未之聞也惟是座有縵袍席無珍異而獻酌彬彬隱然有三爵不

識之戒焉

禮貌

里族中每日相見雖短衣草履或跣足科頭亦必作揖蓋朴實成風惟知禮貌無失不以衣冠不備爲嫌也卑幼之見尊長不待言矣

餽送

兄弟同居之時其內親及友概無私相餽送之禮有餽送者卽細微食物莫不致于父兄其犒使荅禮亦從父兄處分焉且有以儀物餽于父兄或招其父兄飲食者子弟見之必謝如已受賜也

稱呼

山俗稱呼各循其當然之序相對無尔我之稱卑幼之于尊行亦無背呼其字之理其叔伯兄及姑嫂妯娌固無足怪卽外姓尊長父黨交游羣居相呼亦無是也

房產

山間房屋堅固朴素家家世守如子孫蕃衍住居褊窄則恢弘左右或置別業以分授衆子其祖居則嫡長承受永無更替毀棄之理至于田地山蕩皆屬恒產苟非敗壞至極必不肯稍廢分寸也較之朝東暮西遷徙無定者不啻天壤矣

墳墓

墳墓風水山間最重若他處以親柩暴露或火厝者聞之莫不怪異故山中卽貧賤小家亦必擇安穩乾暖之地葬親大姓愈無論也春秋祭掃百世如新永無發掘之慘不爲道路所侵不爲耕漑所及不爲豪勢所奪至于樹木亦不敢毀傷子孫世守至慎至重者也

祭掃

春祭于墳不過清明秋祭于廟不過寒露無廟則否貧富皆然凡係著姓必有祭田凡祭田子孫不得分奪棄賣其約最嚴其守最固其子孫不論嫡庶輪流承當祭之日子孫長幼畢至以

次拜奠極其豐備祭畢而飲尊卑長幼羣聚以爲樂

讀書

有明之時山中科第蟬聯 國朝以來漸乃稀少蓋洞庭之讀書者大概以粗知句讀稍識理義爲常舉子之業習而不精也若富厚之家聰俊子弟未嘗不延師就傳篤志藝文然必待文理精通方許應試一試不售卽廢焉改業矣所以讀書者多而成名者少然邇年以來亦漸趨于科舉矣

耕種

洞庭耕種尤盡辛勤山渚湖干之際阡陌縱橫平原曠

野之間桑麻交錯高者無隙地下者無閒田故麻麥有
矍矍之慶禾役有穰穰之觀良以家無貧富無不從事
田疇卽爲士爲商者苟有餘閒亦卽負耒耜也

樵採

洞庭周圍不及百里田地僅什之一二而山居八九草木繁殖旦旦而伐薪芻之需賴焉所以居民不論貧富少壯皆事採樵深秋之候負擔相望蓋土瘠地狹出息無幾而能溫飽是賴類皆勤勞之力也

漁船

江南固稱澤國而洞庭猶在水央曾網之設取魚蝦以

供歲時速賓客固山村之樂事不擇人而能者也若夫以漁爲業者不過二三爲侶操舟鼓柁皆有廬舍非若他處漁戶挈妻孥與外姓爲伍者

畜牧

雞豕之畜比戶皆同諺云庄家不養猪秀才不讀書既藉爲肉食之便

又可爲糞溉之資也但見豕羊雞犬出入于桑麻掩映桃杏參差之間令人作武陵世外想

蠶桑

貧家富室皆以養蠶爲出熟蓋絲綿之利足當數畝田租所以愛護桑株過于花果而縲繭抽絲婦女咸拮据

爲之也然皆服尚麤儉衣不服帛

賴以辦賦細絲去賣粗者紡績織爲杜袖

其綿繭繭殼皆可以成綿打線以績綿細其細密結實十倍湖袖

古詩云徧身羅綺者

不是養蠶人蠶婦辛勤由來著矣

花果

花果之木不可悉數苟宜于土無不種植桑麻掩映桃李成林盧橘秋登楊梅夏熟園收銀杏家有黃柑梨樹成雲梅花似雪凡所栽培不可殫記非極絢爛之觀足見勤勞之俗

租佃

有田之家自耕者多其或經商于外抑或其田不在本

村則出租亦所不免然租田者亦即親朋之輩所以山中無業主佃戶之稱無承攬租由催甲之例而稱呼交際依然等輩並無貴賤之殊云

租山地者亦然

傭工

傭工之人皆因已之田產既少又無貲經營故于親族鄰里之家得其僱直代為力作自不以為卑賤而人亦未嘗卑賤之也

船戶

山間船戶概非下賤蓋小本經營自駕船隻往來近地雖舊家子弟亦自為之故其裝載客貨乘搭便人總無

駕船之稱合觀租佃傭工風俗敦厚較之他方誠獨異耳

好惡

好善惡惡人之公心山民寧獨有異耶所異者好善如好色惡惡如臭也凡閭里子弟苟有孝悌勤儉抑或品行不端者其父母愛之嫉之自不待言傳聞合山即指為勸戒一善一惡世成口碑

稱頌

凡忠孝廉節之行足以感動貪頑者閭閻父老講論稱道如親睹焉至于富厚之家縕袍草履擔糞荷鋤固他

方所恥笑者而山民亦莫不稱美也蓋家尚儉朴則稱之志尚清潔則稱之孝悌忠信則稱之概不以外飾爲榮辱耳

鄙薄

山中風俗朴實相沿若夫美衣食務聲名健訟好事言語虛花交接吏役干謁縉紳藉勢以自誇憑納職以自大器用華麗酒饌豐盈雖足炫耀他方山民莫不厭惡鄙薄視爲炯戒至于敗壞援濟無人也抑或富饒之人而宗族貧困不肯力爲周濟提携者則其鄙薄于人更無地自處矣

畏懼

山民商賈之外漁樵耕讀各有職業間有浮浪子弟有田產而不耕有詩書而不讀以經營之本爲游冶之資以堂構之遺爲宴飲之地甚至賭博爲生沉湎酒色者親戚鄉黨莫不望之如魑魅避之如陷阱畏之如檣杪不使子弟與之通言語接交游賓客之會酒席之間傳聞畏懼莫不以爲怪異焉

坐賈

山中貿易無分毫虛價卽他鄉過客從不欺誑其所賣貨物亦不過油鹽米布而已珍異貴重非所需也

山中店

無有不做
豈腐者

商販

商販謀生不遠千里荆湘之地竟為吾鄉之都會而川蜀兩廣之間往來亦不乏人苟無貲本負販亦所不惜

鄉情

異鄉相見倍覺多情雖誼屬踈濶至鄉人之寓如至已家有危必持有顛必扶不待親族也即或平素有隙遇有事于異鄉鮮有不援助者如其不然羣起而非之矣

公店即會館

業于商者楚地為多故下水之貨以米為常物山中商民惟向

生意之穩當者為之上水則紬緞布疋下水惟米而已險道所不為也但山中田少必仰

給于客米而楓鎮牙行奸猾最多欺弊俗名打糶者所

得每賤于時價而糶者則加貴焉譬如時價每石一兩糶者出一兩一錢而

賣者山人蔡九霞蔡鶴峰吳仲昭葛允洪王榮初等

始創公店于楓鎮朝夕時價不得而欺其例即公舉商

之公正有才能者按季輪流掌店所到山商之米不投

外行而外行及山民遂就買于公店每石用銀一分二

厘外行斛酒六厘本店六厘即以供客薪水益商利民

之善舉也

大凡賒欠必稍貴于現買而山民賒米不惟不加貴比

現買每石反少一分二厘蓋現銀例投外行則扣外行
經手斛酒而賒米竟至公店重于鄉誼并本店六厘亦
讓矣乃信行久著約期兌銀無悞故賒米亦猶現糶耳

領本

凡經商之人未必皆自有貲本類多領本于富室者蓋

其平日勤儉忠信有餘雖無立錐之地而千金重託不

以為異恒例三七分認出本者得七分効力者富家欲

以貲本託人謀利求之惟恐不得也山中向有二人領

產一係赤貧富翁乃以千金付赤貧者而有產者反不
得領或問其故翁曰吾固視其行止何如耳貧富非所
計也貧者忠信可託而有產者素無信行兼好虛誇况
發本經營豈在準其田產耶不五年而有產者固見敗

壞赤貧者家漸殷實
方知富翁有目云

扶持

山間之人有困守家山或他鄉流寓素無浮浪之名而
適遭蹇厄之時者小本維持人人慷慨不待其告貸求
領也至若游手不羈以無行致困者則雖求告亦無從
耳

交易

房產交易不用草議亦不立下契價概九五折契概書
絕賣及至貧苦加貼又未嘗不稍稍通情其有原價取
贖者除書任憑造葬字樣之外歲無遠近決不拗措蓋

親友之子孫苟能重復祖業無不樂成其美耳至于作
中非親卽友概無得中物之例

姬妾

男婚女嫁貧富各如其偶若賣女作妾斷無此風所以
下賤小家總極貧苦無依終不肯貪圖財利忻羨富貴
將女爲人姬妾者也

乳媪

富家養子皆親自乳抱不僱乳媪而貧賤小家亦未聞
出爲乳媪若子初生而母卽亡者則就乳鄰家或有之
也

賤役

山間貧苦之民苟非向係他人奴僕而擡轎送盤伴當
隸卒之事必不肯爲至如樂工鼓手賤而不齒故皆世
籍云

婢僕

富家奴婢其來自他處山中之人總無有鬻賣男女者
其向係奴僕今至極貧亦有舊主照顧不令其鬻賣男
女者也

撫馭婢僕嚴而有恩飽煖飢寒苦樂均受而訓戒頗嚴
卽見鄰里如對家主婢至二十左右卽聽其父母擇配

或家主爲之婚嫁並無失時之怨僮僕及身而止不令其子孫服役然名分整肅百世不易也

僧尼

邇來僧尼道士充塞里巷雜處四民纏擾誑惑罔作妖
隱若洞庭一山僧道雖有然皆僻處深塢採樵自食與
居民無擾因行商者多繫無齋飯化緣之例至若婦女
倘有殿宇不募自有慨捨施主入寺燒香不待誠諭無此陋風而尼姑皆老年無靠者
爲之故洞庭西山無尼妓之蠹焉

廟宇

洞庭廟宇不過先賢土穀之祠大概因社壇隙地爲之

然茅茨幾椽非有廣廈細旃也蓋有用之土何至爲不
毛之地乎

治蠶

每歲暮春時治蠶蠶有節目其初收也以衣衾覆之晝
夜程其寒暖之節不得使過過則有傷是爲護種其初
生也則以桃葉火炙之散其上候其蠕蠕而動澌澌而
食然後以鵝羽拂之是爲攤烏其旣食也乃熾炭于筐
下并四圍剉桑葉如縷者而謹食之又上下抽番晝夜
巡視火不可烈葉不可缺火烈而葉缺則蠶飢而傷火
又不可太緩緩則有漫漶不齊之患編經曰蠶薦用以

圍火恐其氣之散也束桔曰葉墩用以承刀惡其聲之著也是爲看火食三四日而眠眠則擿眠一二日而起起則餒是爲初眠日初而至二自二而至三其法盡同而用力益勞爲務益廣是爲出火蓋自蠶出火而葉不資於刀矣又四五日爲大起大起則薙薙則分箔薙早則傷足而絲不光瑩薙遲則氣蒸而蠶多懨疾又六七日爲熟巧爲登簇巧以葉蓋曰貼巧驗其猶食者也簇以藁覆曰冒山濟其不及者也風雨而寒貯火其下曰炙山晴暖則否三日而關戶曰亮三五日而去藉曰除托七日而采繭爲落山矣具區志云要唯東西兩山爲

盛然西山之民力勤而守專恐東山有所不逮也

時節

元旦夜始分點放爆竹啓戶獻天于雷下設柜妝祀神辨色肅衣冠相拜賀元宵札竹爲龍燈有長二十節者遇廣場則數龍盤繞蜿蜒生動富家或構燈臺奏竹肉凭欄賞玩焉梅花莫盛于後堡鎮下梨花推之舟頭花繁稱于慈里桃李最盛于玄陽此數景尤爲最勝寒食祭掃雖販夫走卒亦所不廢自首春迄改火壺漿紙錢道路不絕清明插柳檐下穀雨時牡丹鬪艷名種來自亳州好事者平章甲乙風雨無間主人開新釀治櫻筍

應酬頗勞四月初戶戶飼蠶謂之蠶月局房闈簡女工
端午祀先爭勝六月荷花稱于消夏灣七夕穿針中秋
夜香蟋蟀賭鬪西山不興臘月無儻若八日之豆粥廿
四之祀竈除夜之守歲與荆楚歲時同此其大較也總
之洞庭較之諸山風俗不同居者力耕行者服賈游閒
少訟獄稀可望家給人足而無不測之憂也

附古志風俗

湖中諸山大概皆以橘櫟爲產多至千樹貧家亦無不
種以蠶桑爲務地多植桑凡女未及笄卽習育蠶三四
月謂之蠶月家家閉戶不相往來以商賈爲生土狹民

稠民生十七八卽挾貲出商楚衛齊魯靡遠不到有數
年不歸者以舟楫爲藝出入江湖動必以舟故老稚皆

善操舟又能泅水其土貴凡栽橘可一樹者值千錢或

二三千甚者至萬錢

國朝初間橘樹廣其價貴故山民有蓄貲庚午冬樹遭凍死無力培

植况浙橘多出價賤大半山民近無宿糧亦由此也其民勤有蓄千金而樵汲樹

藝未嘗廢也其俗厚民間無淫冶賭博之肆兄弟析烟
亦不遠徙祖宗廬墓永以相依故一村之中同姓者至
數十家或數百家往往以姓名其村巷焉其屋宇固蓋
因湖中風雨迅疾牆必甃覆必瓦雖貧家亦鮮茅茨之
室其冠服樸尚時制之中雖樵汲耕種巾不去首世俗

所戴髮幘紗羅綺麗之衣不用近世雖有用者亦少其
婚喪儉而少文凡治喪事親族鄰友祭儀不事虛文必
以貲助喪家故喪家賴以給用凡嫁女娶婦不適他境
皆近村比境如古朱陳之類其餘歲時慶弔人情物態
與吳城同者不復載

見舊志

科目坊表附

自明永樂後東西兩山科第最盛至國朝而寂寂無
聞豈地運之盛衰乃爾耶翁季霖謂自科甲以及歲貢
俱照郡邑志編次若荐舉以外不敢濫收今襲其意坊
表附列於後

進士

麴信陵

字宗魏洞庭山人唐貞元元年進士直隸望江縣知縣

徐縉

字子容弘治戊午舉人丙辰進士吏部左侍郎贈吏部尚書諡文敏著有經筵講義六卷詩文集五卷

蔣詔

字伯宣正德癸酉舉人辛巳進士工部虞衡司郎中

鄭準

字正衡嘉靖甲子舉人隆慶戊辰進士廣東按察司僉事

勞遜

字惟敏嘉靖壬子舉人隆慶辛未進士廣東潮州府知府

葉初春

字處元嘉靖甲子舉人萬曆庚辰進士禮科左給事中贈光祿寺少卿

秦嵩

字中望萬曆壬午舉人癸未進士四川巴縣知縣

蔣之紱

字赤臣崇禎丙子舉人皇清順治丙戌進士刑部主事

蔡瓊枝 字皖森順治丙戌舉人丁亥進士浙江台紹兵備道副使

鄧旭 字元昭順治丙戌舉人丁亥進士國史院檢討以上洞庭山

吳惠 字孟仁東山人明永樂癸卯舉人宣德丁未進士廣西右叅政

施槃 字宗銘正統戊午舉人已未進士殿試狀元翰林院修撰

葉祚 字應福成化戊子舉人已丑進士福建右叅議

賀元忠 字澤民成化辛卯舉人壬辰進士雲南按察司副使

王鏊 字濟之成化甲午解元乙未會元殿試探花武英殿大學士贈少傅諡文恪

嚴經 字道卿弘治乙卯舉人丙辰進士江西吉安府知府

賀忝 字志同元忠子弘治癸卯舉人已未進士廣東布政司右叅議

黃訓 字季行正德庚午舉人甲戌進士兵科給事中

秦大夔 字聖卿萬曆丙子舉人庚辰進士陝西布政使

王禹聲 字遵考文恪鏊孫萬曆戊子舉人已丑進士湖廣承天府知府

吳嘉禎 字吉人天啓丁卯舉人崇禎丁丑進士福建興泉兵備道副使

施鳳翼 字子翔崇禎壬午舉人順治丁丑進士浙江上虞縣知縣

李敬 字聖一順治丙戌舉人丁亥進士刑部左侍郎

周道泰 字通也明崇禎七卯舉人順治壬辰進士

周而淳 字黎同順治辛卯舉人壬辰進士戶部主事

張延基 字植允順治戊子舉人壬辰進士四川石泉縣知縣

陸鳴時 字繡文順治辛卯舉人壬辰進士行人司行人以上東山

李濬 字德深馬跡山人成化戊子舉人已丑進士湖廣布政司

丁致祥 字原德弘治甲子舉人正德戊辰進士陝西按察司副使

孫學易 萬曆壬辰進士四川憲副

吳暘 字麗中萬曆癸卯舉人丁未進士湖廣布政使

陳睿謨 字嘗采萬曆癸卯舉人庚戌進士偏沅巡撫

王就學 字所敬萬曆乙酉舉人丙戌進士吏部員外郎

徐復陽 字見初萬曆丙午舉人丙辰進士太僕寺少卿

許昂臣 字爾鉉萬曆丙午舉人丁未進士山西巡撫

丁辛 字先甲崇禎癸酉舉人丁丑進士福建浦城縣知縣

吳伯尚 字敬躋崇禎壬午舉人癸未進士中書科中書

秦之鑑 字尚明崇禎壬午舉人癸未進士浙江仁和縣知縣

徐騰暉 字宣仲順治乙酉舉人壬辰進士福建福州府推官

許之漸 字儀吉順治辛卯舉人丁未進士監察御史

陳玉璣 字賡明順治丙午舉人丁未進士中書科中書

吳文之 字與成武山人正德庚午舉人辛巳進士翰林院庶吉士

顧綬 字子印嘉靖甲子舉人乙丑進士北直順德府知府

葛逢夏 字衷之天啓辛酉舉人崇禎戊辰進士關內兵備道副使 以上武山

舉人

沈理 洞庭山人永樂甲午科山東登州府同知

蔡旭 字景暘永樂庚子科浙江烏程縣學教諭著歸怡集

李鏞 字仲韶景泰庚午科江西安遠縣學訓導

嚴瀾 字本之正德癸酉科

陸鵠 字斯立嘉靖甲午科江西高安縣知縣

勞珊 字鳴玉嘉靖甲午科

蔣球玉 字國華嘉靖庚子科湖廣夷陵州知州

蔡惟忠 字士良萬曆丙子科山東沂州知州

沈蓋臣 字孝基萬曆壬午科陝西鞏昌府同知

沈自漢 字超宗 皇清順治甲午科

王需 字遵時康熙壬午科湖廣籍

葉廉 字宗儉東山人永樂癸未科江西上饒縣知縣

賀廉 字以清永樂癸卯科福建按察司知事

史昱 字元愷景泰庚午科江西南安府學教諭

葉寬 字志洪景泰丙子科福建候官縣知縣

吳欽 字宗堯成化丁酉科江西臨安府推官

莊鉞 字仲威弘治甲子科湖廣應山縣知縣

陸彬 號樸菴嘉靖壬午科浙江天台縣知縣

姜節 字均修嘉靖乙酉科江西南康府知府著義經

葉漢 字雲卿嘉靖辛卯科湖廣蒲圻縣知縣

談經 字汝明萬曆丙子科湖廣蘄州知州

葉宗直 字師皋萬曆己卯科

陸萬里 字季鵬萬曆庚子科

卜有徵 字伯符萬曆庚子科山東萊州知州

許元弼 字仲良天啓丁卯科江西饒州府通判

周官 字其人順治丁酉科以上東山

鈕慶 字孔沾馬跡山人明洪武已卯科湖廣安陸縣知縣

許道中 號質齋永樂乙酉科河南新鄉縣丞

陳璵 字良玉正德丁卯科廣西太平府推官

李鼎 字用之正德庚午科河南確山縣知縣

宋雲龍 字從伯萬曆戊子科

劉仁啓 字鼎和萬曆丁酉科山東恩縣知縣

錢豫謙 字行素萬曆癸卯科

鈕國藩 字誠所天啓丁卯科雲南嵩明州知州

姚起蛟 字文台天啓丁卯科揚州府如臯縣學教諭

錢國瑞 字開先崇禎庚午科湖廣醴陵縣知縣

李盛時 字中甫崇禎庚午科

陳咨稷 字子育崇禎壬午科雲南瀾滄兵備道副使

王來誥 字仲文順治辛卯科以上馬跡山

鄒濡 字汝爲武山人順治甲午科浙江遂安縣學教諭

歲貢

蔡蒙 字時中洞庭山人天順間貢廣西南寧府知府

陸銘 字汝新正德間貢浙江樂清縣學教諭

王守成

字若谷嘉靖間貢河南太康籍

蔡羽

字九遠嘉靖間貢南京翰林院孔目

陸治

字叔平銘子嘉靖間貢

陸洽

字世沾治弟嘉靖間貢

蔣秀

字子實嘉靖間貢

蔡雲程

字萬里萬曆間貢山西沁水縣學教諭著包山集

沈懋光

字伯龍萬曆間貢四川龍安府推官

鳳翕如

字鄰凡崇禎間貢湖廣漢陽府通判

蔡正渠

字丕式康熙間拔貢以上洞庭山

王琬

字朝用以字行文恪整父天順間貢湖廣光化縣知縣

王銓

字秉之文恪整弟正德間貢浙江杭州府經歷

姜寬

字大本東山人正德間貢廣東曲江縣知縣

張軾

字子禮嘉靖間貢北直開州學訓導

姜智

嘉靖間貢

葉具瞻

字子欽嘉靖間貢江西峽江縣學教諭

黃聽

字遠卿訓子隆慶間貢江西南豐縣學訓導

黃兆熊

字伯威萬曆間貢浙江於潛縣知縣

葉宗魯

號文山宗直弟萬曆間貢直隸無錫縣學教諭

曹士完

字傲弦萬曆間貢

施子國

號冶城萬曆間貢

楊萬程 號心宇萬曆間貢直隸徽州府歙縣教諭

王斯鵬 字扶搖崇禎間貢直隸徽州歙縣訓導

陸樞 字公榮萬里子崇禎癸酉科副榜准貢

朱永譽 字客卿

陸之訓 字寶周

葉有馨 字子聞

費益修 字復之順治間貢

葉灼棠 字函公順治間貢福建興泉兵備道副使

翁天游 號心齋康熙間貢考授中書舍人遷河南開封府同知著古香堂稿

湯鑾聲 字茂昭康熙間貢以上東山

李顥 字可大馬跡山人宣德初貢浙江松陽縣知縣子濟貴贈郎中

馮景 正統間貢湖廣常德府推官

李恂 字實夫天順間貢廣西布政司都事

殷鈇 字良器天順間貢北直涑水縣知縣

莊大林 號相堂弘治間貢江西分宜縣訓導

李燾 字潔之嘉靖間貢湖廣荊州府通判

劉薰 字心帖嘉靖間貢北直任丘縣丞

劉章義 字季傳天啓間貢以上馬跡山

薦舉

俞貞木 洞庭山人琰孫洪武初江西都昌縣知縣

許 擘 字光遠洪武初應召至京師陳策既而以老乞歸

秦伯齡 洪武中監察御史巡按山東

秦 英 伯齡族人洪武中舉秀才授順德府邢臺縣簿

王勝宗 字紹先洪武中山東臨淄縣知縣

秦文彧 字盛之洪武中湖廣醴陵縣知縣

嚴 正 字子讓洪武中河南衛輝府照磨改山東東平州州判永樂中改唐府典寶

尤 芳 字叔茂洪武未刑部員外郎

李 琦 鏞之父永樂中梁府紀善

嚴 鐸 瀾子萬曆初山東東昌府通判以上洞庭山

葉德聞 東山人洪武初陝西布政使後徙吳江汾湖為甲族

吳 傑 宣德間江西廣陵府通判以上東山

鈕 澤 馬跡山人洪武中直隸池州府知府

葛一龍 武山人天啓間雲南布政司理問

廕敘

徐玄成 字汝文文敏子嘉靖初詹事府知簿

王延喆 字子貞文恪子正德中大理寺右寺副

王延素 字子儀文恪子正德中貴州思南府知府

王有壬 字克大延喆子正德中太常寺少卿

王延陵 字子永文恪子嘉靖初中書舍人

武職

蔡良瑞 洞庭山人明太倉衛鎮撫封武毅將軍子貴替

蔡人龍 洞庭山人天啓壬戌進士廣西潯州守備土酋

王振 東山人洪武初南京府軍左衛指揮

湯用 洪武中福建鎮海衛千戶

蕭顯 洪武中陝西甘州後衛千戶

朱璿 洪武中淮安大河衛百戶

翁應玄 崇禎間南京兵部中營副總兵

陸鳴臯 崇禎辛未進士後軍都督僉事兼副總兵

翁萬裕 崇禎丙子舉人丁丑進士河南開封府副總兵

金履泰 崇禎間山東臨清州守備

錢燁 馬跡山人明初投誠佐太祖克敵有功授指揮
徐良 賜半璽券姪斌襲職永樂間死于陣
永樂初常山護衛指揮賜昭勇將軍

馬榮祖 正德間薦授指揮

劉尚義 萬曆庚子科永生州遊擊會兵變父子四人皆

吳玠 萬曆己卯科

張澈 天啓甲子科大河衛守備

曹祥 長沙山人元季海道萬戶董漕運事

俞信 長沙山人永樂初京都密雲衛百戶

顧旺 衡山人洪武中北京寬河衛百戶

坊表

遺慶坊 在洞庭山西蔡里明永樂間為舉人蔡旭立陳繼有記今廢

登科坊 在姑蘇鄉景泰間為舉人李鏞立今廢

仙桂坊 在崦邊弘治間為進士徐縉立今廢

繡衣坊 在舟里鄭涇港西萬曆間為御史鄭準立以上洞庭山

畫錦坊 在東山岱心灣宣德間為進士吳惠立今廢

文魁坊 在查灣宣德間為舉人賀廉立

狀元坊 在金塔下正統間為狀元施槃立成化間重修

世英坊 在岱心灣景泰間為舉人史昱立今廢

進士坊

繡衣坊 並在查灣為御史賀元忠立

登俊坊

解元坊

會元坊

探花坊

閣老坊 以上五坊在陸巷為少傅王鏊立

登科坊 在倪家湖成化間為舉人吳欽立以上東山

進士坊 在馬跡山西坵成化間為李濬立

進士坊 在雁門灣正德間為丁致祥立

尚義坊 在武山成化間為賑荒中書舍人吳天禴立

節婦坊 在東山楊灣嘉靖二十一年為慎廣鈺妻葉氏立

節婦坊 在施巷西崇禎七年為嚴林妻劉氏立

節婦坊 在菱田崇禎十年為許明妻翁氏立

節婦坊 在坊前 本朝康熙二十三年為吳之翰妻金氏立

貞節坊 在馬跡山內間灣永樂二年為史彥妻劉氏立

林屋民風卷之七終

林屋民風卷之八

古吳洞庭王維德編輯 男其龍錄其章

人物

韓子謂山川清淑之氣蜿蟺扶輿磅礴鬱積雖千尋之名材不能獨當也而歐陽子得五代時小說載王凝妻李氏事謂一婦人猶能如此則知世固常有其人而不得見耳由斯言之靈氣所鍾不患無人而有其人而不得見者可勝道哉姑蘇人材甲天下太湖特西南一隅數百年來科第日盛名士輩出而里夫巷婦不可以非理撓者所在多有殆亦湖山秀異之氣聚而發焉者耶

然深岩窮谷名湮沒而不稱者十蓋五六也余特以耳目之所及者表而出之

孝友

明陸治字叔平世居包山因號包山爲郡諸生入棘闈輒不利不欲縻學官廩數上牒請罷郡守推其才爲後先奏記督學令毋煩諸生試餼如故會從弟治受經於治當貢遜不敢先督學遂檄治貢治固讓不已督學更下書曰貢士者爲縣官薦才亦以表勵風行非直論資較年也諸生治博洽躬行孝友敦睦以先其弟執經交讓縮足榮軌吾甚嘉之其令以貢士歸

仍表棹楔稱褒獎恬退至意治自是治處士服堅臥支硯不出好爲古文辭自娛尤心通繪事晚年貧甚好事家購其畫如珍寶然不以利動意有所許卽不請可得治爲人孝友任俠父歿弟妹五人皆治撫育嫁娶一姊寡居食貧迎養於家歿乃歸葬鄰有指揮楊某雅與治善視衛篆有軍興羨資先亡去御史按覈以爲指揮實盜之獄具而楊貧甚治貸金代償楊得免罪尋坐窶死治爲斂葬又顧正叔者才豪士也與治結交罷浙幕歸家日窘治歲時遺致備醪死復卜地以葬嘗就父遺城居剏先祠屬弟沼供事燦盛

與沼同居怡怡至老不忍析

蔡孝子名至中字時卿洞庭之陽塢里人也父人龍所謂玉門先生也前天啓中以武進士授廣西潯州府守備討賊於羅淥洞力戰而死載良將傳中至中性孝有勇力試爲武學生隨父之任朝夕奉侍惟謹遇士卒能得其歡心方玉門之奉檄討賊也至中願與偕玉門不許及玉門陣亡至中痛幾死哭請制府詰諸營失援狀且勅以盡敵贖罪旣得賊俘親剖其心爲位以祭擗踊哀號軍士皆感泣焉旣乃率死士深入賊地求父屍是時僵尸遍野不可別識乃刺臂血

滴之以爲驗屢刺屢滴血幾於枯最後得一頭顱有紫金網巾環在焉心意其是一滴而血果收且痛且喜遂負遺骸歸署事聞於朝復爲朝貴所抑謂貪功冒險以至隕軀不足贈卹乃復刺血上書於巡按御史重爲疏請得贈玉門爲遊擊將軍給驛歸葬至中以悲傷成疾旣終喪絕意仕進營甘旨以養母每遇伏臘祭祀輒涕泗如雨久而弗衰鄉人哀之稱爲蔡孝子以今順治六年卒年四十六

先人諱名儒字正方少孤性孝友先祖妣守節五十餘年先人事之如一日祖妣羸病經年先人奉侍湯藥

晨昏無間浹月不釋衣履家貧自力於衣食凡祖妣之所嗜者謹進之祖妣壽終哀毀骨立蔬食三年既葬廬墓哀號聞者莫不感嘆墓在本里朝夕必往拜風雨無間時食不論果蔬必親薦冢側徹必泣曰薦如是徹如是思曩日親嘗甘旨時不可得也年七十餘孝思不衰述及祖妣守節事每爲嗚咽出涕先伯母亦少寡無出迎養於家先人事之埒如慈母也性好施與歲稔出粟周急終不責償族中有鰥寡無告者歲必周濟壯歲發憤讀書會鼎革晦迹田園披衣戴巾日與詩僧韻士嘯傲山水間好誦廿一史老

病不釋手年七十八卒山中人至今思之稱道不置予小子力衰德薄不克表揚附記於此俟當世賢人君子

本朝蔡積仁字心涵少時家貧祖父無遺產積仁採樵飛仙山供父母甘旨兄弟四人積仁長年二十餘行賈江湖數年間致金千金父母殯弟娶妻皆積仁力也弟長悉以金錢析之再以餘者分散於貧交疎昆弟不自蓄私財可謂富而好行其德者矣積仁爲人規言矩行雖賈人子有端人正士風焉以故死十餘年鄉里稱道不置

以上洞庭山

明葉裕東山人與歸震川先生游其行事不少概見見歸子所作葉母墓誌銘而知其爲敦厚慈孝君子且知其母爲貞節自矢之母也然其中事多不詳豈所遭之勢有不可明言者耶姑存其文俟當世賢者覽焉其辭曰葉裕居太湖洞庭山中泛湖徒步二百里從予游然又不常留數往來江海間所至語合意卽止數日飲酒高歌甚歡卽又去人皆以爲狂生然與予言其母未嘗不嗚咽流涕也嘉靖三十二年五月十三日母卒且葬來請銘悲不能自止予未爲銘會有倭奴之難裕亦去三年不復見予念裕平生好游

連年兵亂道途之梗存亡殆不可知一日忽復至則又請其母之銘悲泣如故蓋人以爲狂生而不知其孝之如此也洞庭人依山居僅僅吳之一鄉然好爲賈往往天下所至多有洞庭人至其於父母妻子之歡猶人也而裕母所遭異是獨煢煢以終其身裕年逾四十尚未有室家凡生人之所宜有者皆無之裕自言初生時祖母旦夕詛咒拜其祖之主而字之曰葉士貞何不以兒去母患之寄之外氏時葉氏居在澄灣其外家在湖沙灣東西相望一里所外母抱裕倚門望西山夕烟縷起裕思母黯然淚下裕每道此

尤悲也母姓陸氏卒時年六十五裕後妻沈氏生子一人予重其孝而爲之銘銘曰五湖洞庭於是焉生於是焉死我爲是銘其尚何恨可慰幽靈

周誠東山人四歲失恃及長家貧食不足以贍爲人傭作每得肉食必持歸奉母母食餘恐爲妻兒所侵乃盛以竹籃懸置屋梁歸候其母日輒二三至鄰翁張某諭之曰汝乃傭保豈若行賈江湖間較逸且所得恒倍誠曰雖勞且貧得朝夕侍母苟以利棄母遠遊弗忍也母年九十卒誠亦六十餘矣每日先謁母墓而後赴傭所值風雨必簑笠在家側人怪問之誠曰

母在風雨中子獨家居心不安也陸給事子潛同弟子玄至山中聞誠事行召誠而禮異之且遺金以祭其母陸幼齡作孝子傳紀其事

金宗悅宗愉性友愛財不私蓄食不私享兩家兒女更衣并食年逾六十恐子孫或起爭端因自析產凡田廬什器各以義讓至久不決兩人之妻聞之乃相與感泣曰手足一體安可分異遂復同爨如初

丘端吳江縣人少孤與母徙居東山俞塢家貧傭作自給嘗買鮮魚供母妻匿其半將以食子端伺得之間其妻魚有餘否妻曰亡矣端怒且泣曰汝死何難復

本居良風 卷八
娶倘吾母萬有不幸終身豈得見乎遂欲出之妻感其言後亦以孝稱母壽終因母性畏雷每雷電雖夜必匍匐號於墓曰兒在此人稱其孝至比之王哀云金潮蔡仙里人家貧未學性誠篤孝敬父母性善飲以父不嗜酒遂戒不飲父病醫不能治瀝血露禱亦弗效潮乃割股和藥進之立愈父母卒廬墓蔬食三年哀毀骨立有聞當時臺使者歲致粟帛復其家劉御史鳳贈詩有袿翻襟血冷燈照夜烏深之句

沈岳單身窮困父耄嗜酒岳日得傭錢悉供父飲飲輒醉醉卽小遺岳與父共臥起必以身貼溲處推父就

燥夜輒更易其處終父之年如是父亦不知也

以上東山

陳世曙字亮初馬跡山人父士仁遭家難避禍世曙以身當之幾殆奉母挈弟妹僦居湖北鄙爲塾師以養母及弟妹館舍飲食可懷者輒懷奉母父歸病甚曙割股和藥以療家中無知者年三十四始娶妻淮安郡丞李公稔世曙賢具金幣爲聘世曙卽以金歸母爲中弟娶婦已兩親相繼歿拮据喪葬如禮會屢試不售遂棄帖括發憤古聖賢之學與當世名流往復辯論必求其是而後已年六十有六無子易簣時作梅花詩三首以見志

本朝王明遠長沙山匠人也所得錢悉買甘旨供母母病十餘年朝夕不離母寢有某家大興作同業邀之明遠曰母老病奉侍之日短苟以利棄母是貨之也吾不忍母死傾家爲之殯葬哀號哭泣務在鞠躬其兄早歿嫂失身遺孤一歲明遠撫育成人旣娶出已貲以半析之山人服其義咸以孝友目焉

名臣

明葉初春字處元洞庭山人萬曆庚辰進士授順德知縣禦寇賑饑止訟恤民四方聞其惠政越三年行取授禮科給事中建白得大體歷左右給事中值同官

李獻可請豫教擢上怒重譴兵科張棟會初春等具疏申救奉旨褫職歸屏居課子超然世外光宗卽位錄遺忠初春已死天啓二年追贈光祿寺少卿

王鏊字濟之號守溪東山人成化甲午乙未鄉會皆第一廷試第三自編修歷官吏部左侍郎正德元年入東閣進戶部尚書文淵閣大學士加少傅改武英四年致仕嘉靖初遣行人存問曰朕行且召卿未及起而卒年七十五賜祭葬贈太傅諡文恪鏊經學弘通制行修謹冠冕南宮迴翔館閣弘治間召經筵日講時上幸中貴李廣導遊西苑鏊爲講文王不敢盤于

遊田反覆規諭既罷上謂廣曰今日講官所指殆謂若等大篩入寇鑿上籌邊八事又請科舉之外略仿前代制科如博學宏詞之類以收異材事多施行武宗在諒闇內侍八人亂政臺諫交章中外洶洶韓忠定文時爲戶部尚書倡諸大臣伏闕請誅八奄上怒召諸大臣切責衆相視莫敢發辭獨鑿侃侃危言而韓繼之幾定矣亡何事忽中變夜詔劉瑾掌司禮首逐韓繼逐閣臣劉文靖健謝文正遷時瑾訶事者于擾攘中未悉鑿有危言遂以人望入內閣瑾銜韓必欲殺之又坐劉忠宣大戛以激變士官逮繫詔獄鑿

前後力爭之且言土酋未叛何名激變並減死或惡楊文襄一清于瑾謂築邊太費鑿曰楊高才重望爲國修邊可以功爲罪乎瑾時權傾中外毒流縉紳鑿不能遏蹙然見顏面乞歸或以拂瑾意虞有奇禍鑿曰吾義當去他何計也疏三上得歸築怡老園自娛屏謝紛囂惟究心性理嘗作明理克己二箴以自砥礪林居十四年而卒所著有震澤集震澤編震澤長語紀聞各若干卷文章以修潔爲工規摹韓王有矩法詩不專法唐在宋梅聖俞范致能之間峭直疎放自成一家書法遒勁兼工篆隸蓋皆經濟之餘事而

於時文爲尤工也季子延陵字子永號少溪以父廕爲中書舍人風流好事早歲城居與皇甫沔張鳳翼結社有春社編詩曰王中舍集兼遊戲丹青人得其尺蹠便面爭寶愛之兩奉命封藩作詩紀遊贈遺一無所受尋以養母告歸爲人溫厚醇謹舉動壹稟家訓亦一時有名之士也以故吳中稱佳士無有過延陵者

賀元忠字澤民父廉見儒林傳元忠成化壬辰進士由行人擢御史巡視漕河出按廣西發姦摘伏風裁凜然遷河南僉事以憂去起補雲南晉副使兵備金齒

騰衝時木邦孟養舉兵相攻禍拏未解元忠躬冒嵐瘴往來開以丹青之信事且就緒會病乞歸幕下干人以金贖不受夷人作却金亭以旌其廉里居二十四年詔進亞中大夫又十二年乃沒年七十有八子泰字志同弘治己未進士官御史以直言被謫父子相砥礪克已矯俗不增一塵不拓一畝食無兼味衣無兼副出入坐一小航人不知其爲軒冕也

以上東山

王就學字所敬馬跡山人其父死于盜終身以不得盜爲恨每飲酣輟涕洟呼天人咸悲之萬曆丙戌成進士授戶部驗糧廳主事申官需索橫甚解戶有累死

不得掣批者就學稱引祖制章兩上卒得請著爲令
旋以東事轉餉編採聞見疏可慮者四可乘者三語
侵執政不忌改禮曹教習駙馬同鄉顧憲成雅重之
尋調吏部會仁聖太后梓宮將發上當送之門先一
日有遣官恭代之命就學愕然卽夜具疏以聞其略
言皇上之身皆太后之身也凡可報恩者何得復顧
其身今舉期在此一刻則憑棺痛踊亦惟此一刻而
獨斬板送以致聖孝不終聖心何安上領之終以此
得罪無何削籍歸

儒林

宋俞琰字玉吾號石礪先生先世汴人建炎中南渡始
家洞庭包山祖伯成仕承信郎父正國以貢登進士
琰雄邁博聞過目成誦寶祐間以詞賦稱元初薦授
溫州路學錄不赴隱居著書不復仕進凡天文地志
仙書怪牒汪洋枝蔓皆神會玄解不習而挈其要領
好鼓琴精于易學晨起焚香誦易一過寒暑不廢歷
四十年自言遇隱者授讀易法得環中之義其闡發
圖說演繹叅同陰符非苟知之蓋嘗試之者人每扣
其旨琰惟以養心寡欲旁喻善誘學者從游甚衆年
七十壯健不衰一日命童子具湯沐易衣冠危坐召

子仲溫進卮酒飲畢曰吾與汝訣矣諸書未備者成之言訖神采不移翛然而逝所著有易說會要周易纂圖周易集說陰符經解叅同契發揮易外別傳幽明辨書齋夜話席上腐談絃歌毛詩譜若干卷行于世孫貞木後以字行更字有立虞山列朝詩選序略曰貞木元季不仕洪武初以薦知樂昌縣後改都昌罷官家居郡守姚善延以訓子以鄰人事連坐逮詣京師卒建文三年七月也劉鳳記云以勸姚守起兵爲衛尉執送死之誤矣俞氏爲吳中世儒居包山後遷吳郡之南園號南園俞氏貞木自都昌還惟一筐

箱甚重家人啓視之一斫柴斧耳其清苦如此貞木無子以族人子毓爲後毓孫盲無妻子入存卹院吳文定云

明施槃字宗銘東山人幼警敏善應對隨父遊淮陽主羅鐸家與鐸子同學有都憲張某來鐸命其子偕見張試以對聯曰新月如弓殘月如弓上弦弓下弦弓槃應聲曰朝霞似錦晚霞似錦東川錦西川錦張大奇之未幾歸補縣學生正統戊午己未聯捷廷試對策天下第一入翰林爲修撰時年二十三未幾卒于京邸天下傷之館閣諸公大學士楊士奇而下皆有

本居良風 卷八
輓章惋惜繁早喪母事後母以孝稱少登巍科遇先
達應對言若不出諸口以此益重好爲詩雅自負今
散逸無存性最敏諸子百家過目成誦作爲文章不
待思索初入翰林院英宗問卿家吳下有何勝地荅
以四寺四橋問何名曰四寺者承天萬壽永定隆興
四橋者鳳凰來苑吉利太平英宗大悅由是名傾當
世湖山亦由此而重繁雖早終未爲不壽也從子鳳
字鳴陽客淮陰以所業質倪文僖謙文僖驚曰從游
者多矣好古不同流俗惟鳳一人鳳益潛心理學歸
吳提學御史戴珊敦遣入試以病辭錢學士溥以經

明行修薦亦不就絕意進取隱居教授終其身鳳食
貧礪行敝衣破帷不易亦不垢孝友恭順人皆感化
嘗構亭松竹間客至相與宴飲怡然自適人咸稱爲
東岡高士王文恪鑿有東岡高士傳

賀廉字以清邃於易學永樂癸卯京闈第二人授連江
訓導校課生徒終日不倦陞代府紀善爲人方嚴簡
靖與人多忤屢以言觸權貴故官不大顯仕終福建
按察司知事歸家杜門不出一時人才多所造就山
中至今言易者宗賀以清焉

黃訓字季行正德庚午中應天鄉試試禮部不第例入

本居良風 卷八
國子監肄業慨然曰吾知所以自勵矣古之學者耕且養三年而通一經三十年而六經立今既免于耕其爲功甚易顧執一藝以白首寧無耻乎由是專意典籍自六經及諸史百氏無不淹貫嘗爲太學都講辯難不窮人皆以爲莫及也訓才氣甚高不屑意爲舉子業日肆力于古文辭爲文奇偉宏壯頗類其爲人甲戌成進士試禮部冢宰楊公覽其文奇之擢第一當授京職訓乞南京以便養公不許選授兵科給事中朝士以得人相慶訓殊不樂也體素豐下不任勞守科候朝盛夏觸暑一病而卒識與不識皆謂訓

不死必能稱其職非徒以文稱者訓爲人剛介寡合其在兵垣有武弁餽千金却之旣嬰疾其人復携金至詈而絕之曰吾卽死豈可以足污我耶疾未劇卽命市其馬以備棺爲書以謝父母卒年三十三朝野傷之有詩古文若干卷藏於家

以上東山

循吏

唐麴信陵字宗魏洞庭山人貞元初進士及第爲舒州望江令有惠政嘗爲請兩文云必也私欲之求行于邑里慘黷之政施于黎元令長之罪也神得而誅之豈可移于民而害其歲旣卒官百姓留葬于縣境宋

水居民屋 卷八
崇寧四年敕賜靈施廟

明秦伯齡狀貌奇偉義不苟合元末以世不可有爲去書業賈洪武中商淮北天子見而異之召與語伯齡侃侃而談指陳當世得失誠有味其言之也上悅拜監察御史未幾出按山東發奸摘伏風裁凜然濟寧某氏豪猾二千石莫能制伯齡至悉按治之人皆股栗然不專事深刻故法嚴而人不怨伯齡爲人公廉不發私書問遺無所受請寄無所聽居兩月有政聲山東縉紳當道俱嚴憚之執政者薦于朝當內遷尋以疾卒于官下族人英同時舉秀才陳當世事合旨

授順德府邢臺縣簿居官亦有聲

王勝字紹先少時好讀書家貧躬耕田間養父母孝謹會元明之際海內多事絕意仕進家居教授子弟謝絕賓客洪武中詔徵賢良方正之士郡縣推上勝勝固讓郡縣固推勝勝至京師召入見狀貌甚麗上悅之拜爲山東臨淄令是時臨淄薦饑民多流亡勝至下令招徠之設法賑濟復力請當道捐歷年租稅民大悅勝爲人廉靜布衣蔬食爲百姓倡折獄片言務在寬仁然性又剛毅不可撓屈公卿大夫有以私事請寄者必面斥曰吾布衣得官固當奉職官下奈何

林屋民風 卷八
賣朝廷法乎終不聽以此大忤朝貴乞骸骨歸歸家
放浪山水飲酒歌詩以壽卒五世孫名儒見孝友傳
蔡蒙字時中年十一舉邑諸生三試南都不售貢入國
學歷事兵部爲尚書馬昂所知選授溫州府同知成
化戊子泰順山中鑛賊變起疾傷滿野朝命督兵勦
之賊斷道以阻勢益熾蒙夜帥壯士五百伐木通道
官軍宵濟會天雨雪賊多凍死衆議急擣賊巢蒙曰
彼烏集之衆無終日計苟益兵制其死命挺而走險
祇激亂耳可以恩信致之且我軍士卒多凍倦可少
休衆然之遂推蒙行蒙復建議編著甲令立鑛賦長

民始帖然至浚渠築田積粟賑飢溫民感激詣闕上
書陞本府知府丁外艱起轉辰州知府又丁內艱補
廣西之南寧爲治廉平不苛罪無申證考未竟者悉
原不問積勞致疾上章乞歸越七年卒 以上洞庭山

明吳惠字孟仁東山人宣德中進士授行人奉使占城
涉海七日遇颶風同舟者皆驚愕無人色惠意氣自
若操筆爲文投海中風濤頓息使還擢桂林知府時
義寧峒蠻結湘苗寇爲亂臺司議進兵勦滅惠曰論
之不從進兵未晚乃單車抵賊所賊羅拜歸服武岡
州盜起詐言推義寧峒主爲帥洞蠻楊文伯等叩頭

自訴曰某死公所貸耳敢爾耶盜遂沮解修仁荔浦
猺獞數剽掠道梗惠召諭以威福人給郡符使佩之
在桂林十年化賊爲民政移獷俗陞廣西右叅政柳
慶夷窺間薄城城中洵懼不知所出惠乘其不備率
門卒夜斫其壘獲賊首百人遂驚遁洗氏女已字人
聞其暴欲勿與乃抵言造妖惡語惠具得枉實立釋
之尋致仕歸惠爲人有氣節遇事敢爲前後所上章
疏皆鑿鑿可行里居三十年田廬不改其舊好賦詩
善行草山中人登進士第自惠始也

嚴經字道卿父文瑛孝友敦璞里中推爲長者經少賈

於沛先達賀元忠謂曰曷不就進士舉挈遊兩京淬
勵問學中弘治丙辰禮部試授南京刑部主事歷員
外郎郎中遇事裁決如流尚書張敷華亟稱之擢知
吉安府命下宅艱後補彰德歲荒旱民飢流冗道路
經遍禱羣望雨隨車至又發廩賑給流移皆復郡有
疑獄歷前二守不能決經覆讞立爲決遣咸稱神明
藩府宴餽妓樂經一切峻却時流賊披猖所至殘破
經修陴繕甲賊不敢犯奏最當膺顯擢掌銓某應召
道彰德無遺贈銜之抑不得遷俄病足遂致仕歸年
五十五孫果字毅之能詩文著有天隱子集

以上東山

丁致祥字原德馬跡山人正德戊辰進士授戶部主事
監居庸德平軍儲日與諸生講說經義如家居時聞
廣鹽權之利因緣乾沒者輒數十萬部以致祥往糾
摘奸弊若算勾股一切清出又條上利弊五事皆見
採納先是漕艘自江達淮中多淤滯致祥督漕興復
儀真廢閘專堰利者以浮議沮之致祥不顧爲文勒
石以垂永久歲省金錢萬計而運道通達擢湖廣布
政司叅議轉陝西按察司副使撫漢中流民恩威並
行在楚在陝兩遇水災勸貸賑濟全活者無算他所
興革一以實心處之爬搔釐革若切於身必去之而

後已陞湖南布政司叅政遂以老乞致仕歷官三十
餘年囊無長物惟題咏篋什甚富其孫軻落拓不羈
以文學著名

吳暘字麗中萬曆丁未進士初授大理評事平反活九
人遷戶部主事督餉天津歷員外郎擢河南知府時
福藩國洛陽以帝愛子僮客放縱吏不得問暘持已
廉潔守法不阿輒引義規諷王王戒左右斂輯民賴
以安陞浙江僉事轉山東尋陞廣東叅政香山澳者
倭奴貿易處也距香山縣治二十里倭奴萬指屯聚
其中而奸民爲煽誘築城造炮臺有不軌志巡撫何

公士晉議弭之以屬暘暘嚴緝奸宄杜絕交通迺召其渠帥諭以朝廷威德咸俯首聽命毀其城夷其臺事竣會何公以逆璫播虐被禍而去其績弗獲上聞尋擢四川副使陞江西右布政改福建轉左時海內多事征調旁午暘殫精竭慮報額獨羨庚午入覲召見敷對詳明上領之命仍赴閩道病歸卒年五十六閩撫按敘勦撫海寇功贈太僕寺卿

良將

蔡人龍字君伸號玉門先世陳留人宋建炎中南渡始家洞庭之暘塢村祖雙塘父隱西俱稱好德爲鄉祭

酒人龍生而奇偉長喜讀書能文章會屢試不售遠遊楚漢間與楚漢諸名士相往來神廟未四方紛紜因慨然曰大丈夫當斬頭陷胸爲國家任危急奈何屈首一編作毛錐子生活計乎遂去書學劍習武藝讀太公兵書中萬曆壬子試再中天啓壬戌試時逆璫用事後人龍第率輿援得善地去人龍獨不肯屈節淹滯不得用乃伏闕上書謂國家制武科收非常之才效犁庭掃穴之績今異懦者以優游內地爲幸其如邊徼之外赤白旁午何臣願得當一面效尺寸誓以馬革裹尸幸矣書上天子嘉嘆下其事于本兵

本居民風 卷八
尋授潯州守備潯州粵西重鎮萬山盤蠱中有潯江
江廣三百餘里最險惡爲大藤峽孤藤斗大延亘兩
崕諸猺蟻度如徒杠其巨魁藍胡侯槃四姓窟穴在
焉屢作弗靖人龍旣至間出奇攻勦以身先之戰無
不勝執政交章薦最當右遷值四姓遺孽據地倡亂
督府檄人龍會諸屯營合勦之人龍親自統勁卒夜
發緣木攀蘿直抵巢後急擊賊殺賊數十百人是時
賊不虞我至且素易我師以故乘勝逐北輜重妻子
俱棄走潛伏榛莽間賊旣逸人龍度賊必整衆襲我
因自屯兵餌之而令諸將分伏左右夾攻夜半賊果

來人龍奮擊身被數十創他營旣忘人龍得首功又
素畏猺莫敢救人龍裹創復戰格殺數十人力盡被
執猺每戮一人則詰誰何曰我蔡守府也以不類斫
之再詰復云又斫之旣無一人不稱蔡守府者猺怒
盡殺乃已蓋猺意欲生公麾下不知爭欲代公死遂
遇害時丙寅八月也事聞贈遊擊將軍給驛歸葬兵
民立祠署左春秋享祀不絕

錢燁馬跡山人明初投誠佐太祖克敵有功授指揮賜
半璽券姪斌襲職永樂間死于陣

劉尚義中萬曆庚子鄉試擢永生州遊擊會兵變父子

四人皆死于任 以上馬跡山

文學

明徐廷栢洞庭山人爲人開爽讀書獵要義所交皆一時名士文敏縉之族人也王文恪鑿嘗亟稱之

徐震字德重父炯字宗宜家世好文山中多任俠尚氣不事詩書震力變其俗少從陳繼學詩有弔項羽廟睢陽懷古輓岳武穆詩傳播遠邇與劉溥晏鐸王淮湯胤勣蘇平蘇正沈愚蔣忠王貞慶倡和有名于時稱景泰十才子久之謝絕賓客歸山中垂簾焚香雖鄰里無行跡卒年七十有八子潮字以同能詩工書

好學不倦後以孫縉貴並贈吏部左侍郎震兄章字德彰亦能詩王文恪撰震墓志云德重與其兄德彰日相劇切學益進

蔡昇字景東號西巖博涉書史尤工詩賦爲人規言矩行以名教自任累與鄉飲建婚喪亭四方賢人慕其碩德咸造門求見具區百詠流傳于世所著有太湖志西巖集成化中以子蒙貴封中憲大夫幼子洋集太湖續編能繼父風

蔡羽字九遠號林屋山人又稱左虛子少未知書日與羣兒走山巔放紙鳶爲戲其母數戒之必泣下遂折

木屋長風 卷八
節誦讀其學邃于易爲程文以應有司而辭義藻發
每一篇出人爭傳以爲式閱四十年凡十四試瑣院
不售嘉靖甲午以歲貢赴選天官卿雅知其名曰此
吾少日所聞易蔡生耶奏授南京翰林院孔目居三
年致仕歸卒于家羽爲人狂放不羈聰明驚絕人凡
經史百家無所不通不習訓詁而融洽貫穿能自得
師爲文法先秦兩漢洞庭諸記朗峻高潔可與柳宗
元永州李孝先雁宕諸文爭長其隱然自負之意殆
不肯以瓣香屬某氏而同時諸公與之齊名如文徵
仲者雖雅相許竊自謂莫已若王貢士寵與其兄守

同學於羽來居洞庭三年而其詩學皆羽所指授也
羽早歲詩微尚纖縟旣而滌除靡曼一歸雅馴晚更
沉著時出奇麗見者謂雖長吉不過則大悔恨曰吾
詩求出魏晉今乃爲李賀耶其高自標致不肯屈抑
如此所著有林屋南館二集

徐鱗字紹卿文敏縉之弟祖父以貴雄於閭里父卒其
母蔡携鱗依同母弟羽以居受學於舅氏詩文皆得
指授初名陵字少卿慕李陵之爲人喜從少年俠遊
耽暱倡樂盡廢其產數射策不中遂棄去晚年食貧
喪子寄浮屠舍皇甫汈及張枚劉鳳掃室布席爭延

致之年八十六卒。鱗少爲詩，與二黃及皇甫湜互相
摩切，晚而稱同調者。汭與二黃之子河水、姬水也。河
水稱其詩貴華采，尚標致，經營用思愈老愈深。汭爲
醪金刻其集序而傳之。

陸文組字纂甫，號延州，爲人樸素，重交與。丰神秀美，和
風襲人，始爲賈於淮夷，然不屑忽。覩黃河奔流，恍焉
有悟，歸而與友人楊權，千古遂工詩。松陵王叔承豪
士也，同時以詩鳴，與文組唱酬甚契，嘗遊吳門學士
大夫咸稱慕之，聲名籍甚。雖蕭然四壁，晏如也。其詩
淡遠，有王孟風格。當時謂陸治，函中有詩：文組詩中

有四目爲包山，二陸云有北山篇。鴻里什江上草諸
集行於世。

王守成字若谷，少歲隨父遊洛陽，補太康邑諸生。嘉靖
初貢入成均，不赴選，居家教授。生徒一時名人多出
其門。下後歸洞庭，與蔡羽、陸治兄弟交最善。山中人
多業賈，不事詩書。守成以文章倡率，風氣漸易。於時
葉初春、秦嵩受業成，進士秦惟忠、蔡雲、程沈懋光輩
俱其所造就也。守成爲人剛方正直，不苟言笑。與門
弟子講解，終日不倦。工於詩文，懶自收拾。晚歲益潛
心性，命之學年八十餘，無病而卒。祖勝，見循吏傳。

蔡旅平字文若自號隨安道者爲人蕭散簡遠有遺世
獨立之概博涉經史尤工詩賦愛賓客其所交遊皆
天下有名之士也終身不事生產日與其徒乘扁舟
嘯傲山水間浹月不返至則屬善繪事者圖其迹凡
山中巉巖窮谷曲池幽澗以及禽魚花草嘉樹美箭
之屬悉圖而有之又自作洞庭紀勝一集以誌其勝
屬工書者書之成一大帙文章不尚纖縟記序有柳
子厚風格詩在晚唐溫李之間晚年構天際樓春草
堂以自娛改號天際主人年八十六卒孫正渠字丕
式府庠選拔貢生作爲時文湛深經術吳中縉紳鄉

先生爭延致之屢試瑣院不遂厥志而歿有詩文稿
各若干卷藏于家未刻

秦嘉銓字存古補嘉邑諸生長於詩尤善屬古文書法
亦道勁山中人多寶貴之嘉銓爲人豪邁風度俊逸
嘗攝敝衣冠遊市井識與不識莫不指之曰秦先生
也漁人諸姓居同里失其先世譜牒詢諸父老則云
其來尚矣相傳春秋時居此嘉銓一日營別業緣山
鑿池發一石碣上載越大夫諸稽郢之墓字跡蒼古
類秦漢人書嘉銓卽告諸姓族屬俾守祀之不求其
直復爲植松柏作墓誌銘山中好事者爭往遊焉且

稱道嘉銓之義不衰也

本朝蔡汪瑟字子昭號惕菴邑庠諸生少時讀曾子曰三省章悚然警惕因以惕自號汪瑟爲人正直涯岨甚峻人有過必面斥之交友不苟合工詩博學至老不厭家貧棲一斗室中布衣蔬食晏如也善鼓琴酒酣輒動操清音激越怡然自得晚年游心地理不求貨利與隱士徐昉友互相歌和連月不輒山人咸器重之年七十餘卒

蔡銓字宰均號丈白爲人言規行矩以名教自任讀書獵要義經史百家無所不貫喜吟詩清微淡遠有王

右丞風格教授子弟嚴而有方子姓中遇爭競事質之銓不煩辭說怡然冰釋家貧饑饉薦降族中有金數百金置銓處銓家累日不舉火意其必假用矣未幾往取封識如故其操守廉潔如此所著有四書講義詩經講義甫成尋坐窶死未刻

陳綸字世章號西亭父文炳著四書合參病革未成綸少歲發憤讀書及壯好事筆墨尤以古歌詩自負希風謝康樂曹子建一流人物所著有江漢草西亭續稿若干卷終身隱居不仕嘯傲泉石間郡守陳滄州慕其人造廬謁之相得驩甚無厭恨相知晚也隨載

酒泛湖歌和累日稱之曰樂天君子

以上洞庭山

元葉顥字伯昂東山人父國英倜儻豪俠當元季兵興欲教子鄉無碩儒緱山王鵬避亂依山前葉氏國英遣子從游葉以富傲國英國英曰我能使兒讀書成器齊奴不足齒也國英與長興耿炳文友耿延助教宇文諒主家塾令子就學國英厚遺其師輒逾於耿後諒撤講至國英家適江浙提學李祈來訪一日忽悵快國英前謝李曰妻子旅邸能無動于中乎國英已遣人致醪粲地他所需必具祈喜因留國英家于是顥復從祈學學大就後舉浙省孝廉爲和靖書院

山長嘗慷慨不嫌所蘊挾策走燕京道梗流落濠亳間明太祖定天下始克歸兵後母弟俱亡家四壁立無意于世號浮丘醉史放情詩酒人多憐之時炳文從討張士誠有功封長興侯聞顥困滯招顥敘通家好欲爲處業振贍之且將薦于朝顥曰時去志違年幾知非毋庸是爲也吳興人多從之講學留連卒歲竟旅死

明吳懷字鳴翰號東峰叅政惠之子少補邑諸生負氣伉爽風度翩翩工書屬文尤長於詩詩成輒手書小楷多爲人持去不存稿累困塲屋潦倒江淮間鬱鬱

不得志遇故人詩有云自是五陵多感激不因流落
易沾巾臨歿夢中詩云忽憶廬山舊巢穴竹林雲影
正飄飄語其子云吾故本山中僧也弟恪字承翰亦
能詩

吳文之字與成曾祖信見隱逸傳中文之才性絕人七
歲能屬文讀書日數行下未弱冠中應天鄉試登正
德辛巳進士選庶吉士年二十九卒于京邸詩文以
清新簡健爲工新齋詩雨驚秋枕夢風落夜簾花憶
唐儀部沙淨明書幌溪喧答棹歌秋興隔岼水高迷
過雁層巖雲暖綴晴虹聞黃季行消息病裏無家金

橐盡夢中有記玉樓新並佳句也一時爲士林所吟
賞兄大江亦能詩與文之有媲美集大江之子九達
博聞強記於書無所不讀所著有經史異徵繼繼稿
最著者梅花賦責志文惜皆散失

張本字斯植自號五湖漫士王文恪退傳家居從學古
文嘗讀書福濟觀爲道士賦九月梅花詩都太僕穆
見而使人詞之本方正襟夜誦太僕就之晤語賦詩
贈之或延致爲塾師門生韓某得其大父私遺金謁
寄本拒之韓自埋于館下無何韓死本知其藏驚往
白其父兄發取之其廉潔不污如此所著有五湖漫

聞五湖漫稿各若干卷黃姬水張鳳翼共定其詩陸
師道爲傳

本朝翁澍字季霖博學知名家多藏書尤善屬五七言
歌詩所交率當世賢士大夫著具區志一編實足補
蔡景東王守溪之所未逮而奇逸振厲序事簡質卓
然成一家言庶幾閱覽博物之君子矣

以上東山

明錢孝字師舜馬跡山人植學敦行隱居授徒所著馬
跡山志詞簡事核有良史筆法

明薛南字圖南夫椒山人山中之俗以魚鹽爲業南獨
有志于學因告其父曰兒將爲彼不爲此矣父亦欣

然聽之南遨遊四方謁諸名人歸則講求于邑人毛
式之朱信夫唐希古益以深造以孝事親以友撫弟
有無相通白首不改庶幾篤行君子云

葛一龍字震甫武山人少嗜古力學挾策遊燕趙齊魯
援例補國子生累試棘闈不第歸以娛親孤吟獨賞
足不出山而詩凡數變蚤年工剪刻多清綺之句晚
歲出入鍾譚稍近楚調然交遊日廣貲財散盡止薄
業在南都歲必一至寄身闖闖喧填中而繩床席門
苦吟不輟謁選吳橋范文貞公景文識其名異而問
之曰得非吳下詩人葛震甫人呼爲葛髯者耶召之

及階奮髯聲喏文貞目而笑曰是矣除雲南布政司
理問嘗攝州縣篆多惠政不私贖緩宦橐蕭然所著
集十餘種在都門有擊筑草景陵譚元春序之曰天
涯久滯觸物悲思忠孝不暢心有斷續震甫之所謂
筑也然震甫逸情高致埋照於車塵馬足之間彼都
人士以為必有所營於此而孰知震甫殆不然也有
營者所以度日久住者所以忘情此皆詩人之息機
任運似趨實舍而苦吟終日可為一快者也此深知
一龍者矣子承夏御夏昭夏皆能詩惜俱死亡
林屋民風卷之八終

林屋民風卷九

古吳洞庭王維德編輯

男其龍錄其章

人物

隱逸

漢舟里先生姓周名術字元道周泰伯之後一號霸上
先生今洞庭山西南有舟里村其故居也因以自號
綺里季姓吳名寔字用祿隱居洞庭山之綺里因以自
號今石橋馬跡尚存

東園公姓唐名秉字宣明隱居東村之園中故以自號
夏黃公姓崔名廣字少通隱居慈里灣有井名黃公泉

清冷無脚至今存焉史稱四皓卽此四人也其後更
隱於商雒深山中

後周洞庭生者易姓栢其名父易安爲征西將軍生甫
八歲從之塞上卽諳騎射雖老兵宿將不能過者從
父巡城敵兵擁至父欲走生日走則城與俱陷止則
以身當之姑戰以決雌雄可也卽大呼馳前手刃其
牙將數人敵兵氣折遂退帥府定功授生爲征西府
叅軍生聞而耻之笑曰吾以一戰博叅軍哉而其父
見時事日非中原多故亦密誡生日吾爲官守義不
可去汝今猶可全身後日得全易氏之祀吾心慰矣

生涕泣受命乘夜以小舟渡江而南止襄陽襄陽
多才人生日與吟和遂以詩名一時由是楚中豪右
爭欲致之生以爲煩乃往江南覓佳山水以下居得
太湖之洞庭遂結草廬於山之麓隱其姓氏自名爲
洞庭生焉生旣居洞庭拾芋橡以自給春秋佳日輒
持竿釣魚風雨卒至則箕踞長嘯俟風雨過緩步行
歌以還時蘇州都御史向士完賢人也聞其名欲遣
使招之度不可屈乃遣其子向成易儒服徒步往山
中與之爲友久遂成莫逆向成故善詩與生咏賦頃
刻數千言而生文思超卓出向成上成間以精微蘊

與之義質之於生生口若懸河詳分縷析不少休成益心欽之會歲饑生子然無倚士完乃令成以千金遺生生不受謝曰不貪爲寶貧士之常成曰非敢以汚君也倘可奉爲買山錢乎生乃受之市花卉以玩日不留一緡生年二十一未有室士完有女年十九成妹也士完數使成言之欲納生爲壻成曰生隱士大人以勢位臨之必不可士完乃上表自言老病願乞骸骨解印綬辭官與成見生生談論竟日相得甚歡後卒以女歸焉生又嗜酒每沽酒獨酌必向西坐設兩樽引滿澆地拜拜輒嗚咽不起起乃以壺酒立

飲蓋心念其父之在邊也其枕席間嘗有涕泣處妻子詰之終不以告及病乃邀士完及成告之曰吾本姓易氏家世閩閩父安爲征西將軍今特以世故自引來山蒙大人之惠賜之矜恤俾就室家今以天命不克自興所著詩文一千六百卷并子二人悉以累大人不至湮易栢之名絕易氏之祀足矣遂卒年二十九士完大驚歎具禮殯葬旣而問其女初未嘗見其挾冊吟題也生死未一年其父安以忤旨誅死而其後二子炯烜皆隱居樂道至今子孫不絕焉

遺編

勝國

宋散髮書生不知其姓氏居洞庭山每科頭披髮故自
名散髮書生時高宗南渡後金兵日迫賴岳武穆韓
蘄王張魏公輩分兵統護生每從田夫野老訪問邊
警若語之曰金兵敗則喜動顏色若曰我師敗則悲
不自主仰天大叫輒至嘔血後病死有書一篋人發
而觀之則史記一部旁有小楷皆其評註所論皆獨
出意旨者今其書不傳

李玉中稗聚

蘇福吳人也有奇才八歲時父命賦新月福應聲曰氣
朔盈虛又一初嫦娥底事半分無碧紗籠就青銅鏡
一幅先天太極圖父大稱賞應試舉輒不遇便超然

名利慕古夏黃公之名徙居洞庭之慈里灣流連山
水諷詠竟日與其友陸子羽田山人隱居弗出後子
羽山人應張魏公之命出爲河南府推官益孑然無
侶時於風雨中獨乘扁舟往來湖中以洞庭本西山
乃倣孔稚圭北山移文作西山移文以致諷子羽山
人焉

見聞雜記

元馬國珍居馬城應召至京爵之不願力祈還山賜號
靜逸處士復賜御寶詩其詞云儒人馬國珍稟性剛
明持身雅正讀書學道志操逸於古人樂善安閑簡
靜宜爲君子不爲祿仕甘分山林可號靜逸處士

曾雲卿少時與張信爲友信出仕每勸雲卿同行雲卿笑而不答信旣去則汲湖水洗其耳後信爲銓曹屢使使招之雲卿卒不往徙其家於西山之陰業蔬圃以自給而信心重其爲人輒物色之不得也會有出爲吳邑推官者信具書一封禮幣一襲致推官且誠之曰余故人曾雲卿管樂材也必爲我求之推官旣至吳卽親至洞庭訪所謂曾雲卿者曰此地有灌園曾翁無曾雲卿也推官乃易服懷書幣偕一客以過之入門問曾翁在否有孺子出對以在園中樹藝且請客坐進退言語皆有儀節其室僅數椽而琴書羅

列不類田野民家少頃雲卿挾耒以歸見二客驚問曰客從何來曰從京師來至吳遊學聞翁高以故願望見翁乃易服相見坐次談及朝事推官問曰張銓曹一時人望且居洞庭翁當識之雲卿曰銓曹才有餘而學不足不可任大事所云爲趙魏老則優不可爲滕薛大夫者也推官曰今朝廷倚張公付以東南半壁有何事不可了雲卿曰恐非一人了得推官起曰張公令某等請翁共濟卽出書幣置几上請與同行雲卿鼻息隱隱不復有言若自咎歎者推官力請不可辭以詰朝上謁明晨往候之門閉不啓啓門

而視書幣不開而室已虛無人矣推官復命信撫几
歎曰求之不早實懷竊位之羞因作詩曰遺大投艱
集於藐身邁相我國家端賴雲卿雲卿不來予罪曷
箴高山流水兮惟冀自珍 石田雜記

洞庭漁人不知其名姓喜讀楚騷每日漁畢計所獲可
支數日糧卽沽酒一壺挾楚騷一冊登西山之巔舉
杯獨酌朗吟山鬼一過輒復痛歌浩飲飲醉便以壺
所餘澆山石土牽衣大叫曰屈子屈子倚石長眠若
羽化者人之見之以爲仙也後不知所終 林氏日抄

明許曄字光遠以隱士有文名洪武初召至都以所著

詩經義進復陳省刑薄稅之策因獻詩曰布衣蒙召
入京師足躡春風步玉墀父老喜除秦法令儒生重
見漢威儀九重鸞鳳翱翔日四海魚龍變化時自古
金陵多王氣聖君應建萬年基上喜悅欲授以官曄
稱老乞歸賜布袍遂其素志故山中有許山人茅亭
以上洞庭山

元王鵬字九萬東山人博洽經史隱干山之北至正間
徵之不起著有緱山集

明吳信字思復世居東山之武峰爲人踐履篤實以明
經潔行著聞廓然獨居不至城市人皆聞而慕之晚

年離世絕俗爲學益力有柚莊稿山居雜詠弟敏字思德少補博士弟子酷嗜吟咏自以所見不廣走湖襄淮汴求訪名流及歸放情山水與兄信弟紀唱和以詩名吳中人比之三謝云所著有聯珠集

王銘字警之鏊兄少隨父任光化年未艾歸臥湖山絕跡城市號曰安隱鏊立朝三十年人不知其有兄也弟銓字秉之以府學生貢入都值逆璫亂政嘆曰此豈求仕時耶遂授廸功郎告歸與其兄徜徉山水扁其堂曰遂高號中隱所著有夢草集皆與兄倡和作也

義俠

宋楊七洞庭人也與楊么爲兄弟么旣反岳武穆奉詔討之七乃條陳么可滅事宜卽招降諸策也武穆用其計么遂平武穆列其功於朝詔封之爲武散郎固辭不受

李玉中稗聚

明嚴鐸字元振九歲值家難大父陷縲紲鐸持刃怒曰春秋大齊襄復九世讐今不三世能坐視乎家人解慰之曰若壯而訴之朝刃諸國當不愈於刃諸巷乎鐸唯唯已就塾學爲文頗穎悟尋以諸生入國學上海陸文裕公深爲司業拔其文爲六館程式值倭夷

入寇鐸以策干軍門曰太湖口昔中山王進兵地也請戍守鐸舟還突與倭遇戒曰勿急擊須其渡襲之倭半渡鐸鼓舟進手射殪三酋賊惶駭走獲軍輜鎧仗甚夥瀕湖遠近得不被兵皆鐸一戰力也巡撫曹邦輔上其功詔從優銓敘鐸詣闕乞終養陳情慨切上許之母歿謁選授東昌府通判職治漕河鐸視水要害作隄防易置夫役終免徒決之患監視臨清關稅得羨千餘金悉資河工檄攝府篆安靜無擾臺使者交薦將超擢會同官有忌之者鐸堅意乞歸放情山水絕口不談世務年七十六卒

蔡維寧字以寧弱冠入長安工部尚書柳佐一見奇之遂定交時柳方董役慶陵維寧實佐經畫以勞例授官不拜會逆璫毒流縉紳柳欲上疏發其奸病不能起泣語維寧維寧奮筆代草烈烈數千言疏就柳已病革其家人竊焚之維寧忠憤不得抒慟哭出都門賦詩以見志璫誅維寧踊躍之臨清拜告柳墓道病而返竟卒年三十一先是山中挖煤爲害維寧倡同志作挖煤謠上當事得禁止維寧好爲詩歿後其友王倪金俊明輯其遺詩名曰秋陵獨響

本朝蔡來信字成之號鶴峰西蔡里人景東先生之子

林屋民風 卷九
姓也父開字玄錫吳庠諸生爲人端方載在縣志來
信少孤家貧力食挾微貲行賈四方克勤克儉遂以
致富輕財重義立祖祠建義塾歲時宴會必以規言
矩行誠諭族黨歲稔出粟賑饑山中人多所全活又
歲出餘貲分散於貧交疎昆弟建胥口木瀆兩橋置
義塚鋪山路無善不爲年八十六壯健不衰施惠於
一山者無算累與鄉飲言語動作一以古道自處洵
可謂有齒有德之君子也子汝震字聲遠敦厚慈孝
力行善事能繼父風

蔣子芳後堡人爲人正直教授生徒始終不倦與隱士
徐枋爲莫逆交歌詩飲酒相得驩甚山中遇絕嗣塚
墓子芳捐束脯爲之添土立石著其名春秋治二簋
祀之復作詩文弔焉

王元美性好施與專趨人之急所感德以百數建天王
寺山門羅漢寺前夾墩界兩處茶亭冬夏卽其內施
湯水行人便之至今蒙其惠

鍾士華字方宇慈里人家貧傭保自給康熙戊子己丑
饑饉薦至日一粥不再餐妻勸以子女易米士華怒
曰身可死不可辱也後米價騰貴益窮窘食累日不
下咽妻欲行乞士華怒曰身可死不可辱也遂自經

林屋良風 卷九
死鄉里哀之稍爲振贍妻子得以無恙焉士華爲人誠實終身不敢爲非雖傭保者流亦可爲士之辱身賤行者風矣

葛以位字允弘爲人慷慨家累千金盡其有以振人不贍諸所嘗施終不責償先是山中人多溺女會郡有育嬰堂以位捐貲設留嬰堂於鎮下里復爲文勸戒人皆感化全活子女無算

以上洞庭山

明陸俊字伯良東山人狀貌奇古好著古衣冠人咸以爲狂生然伉俠負氣講論世務其家先爲馬甲悉其害嘗草疏擬叩闕大意以北人習馬南人習船南人

爲馬甲太宗權時之制也宜令南北各復其舊又言吳下官田稅十民田稅一均之則國用不虧民不困又言錢久不鑄且竭宜復五銖備一代制又言州縣官剋下宜時糾察又言鹽法急盜滋多弛其禁盜將自息其書數千言屢易稿無間寒暑行坐寢食得一字卽起易之欣欣然告人以爲必可行也始干當道若不聞已不問貴賤賢愚遇人輒授之又榜之通衢市人皆目笑之俊自若也其後馬甲得除田稅稍均言者實采其說俊雖不用於世而志亦稍慰焉年八十四卒子奎克承父志弘治間秦晉大饑奎輸粟往

賑詔授承事郎奎曰損益盈虛天道也出粟賑饑國
章也顧煩君上榮我乎棲隱山中以觴奕娛老

吳天禮字原敬父敏見隱逸傳天禮氣度弘遠弱冠長
區賦凡三十年不以累人人感其德稱爲吳四糧長
建渡水橋至今民蒙其惠成化中以賑邊授中書舍
人弘治間吳中歲祲天禮發粟賑饑事聞詔以尚義
旌之後結廬翠峰自號蘿屋

朱良知字致甫少讀書饒才略負經世之志嘉靖間倭
夷入寇良知結束從戎多所匡建倭平治裝之南都
爲海忠介瑞所知引爲莫逆交一時臺省機務非良

知弗決也忠介性孤峻門無揖客凡馬政踐更舖戶
倉兌諸役議必行者民咸不便良知條書相告多所
匡正戊子歲大祲民不堪命所在剽掠當事議亟勦
滅良知嘆曰百姓飢窮故爲盜賊宜少挺緩瓦解雲
散矣奈何迫劫使爲亂哉遂請於官出橐裝千金買
粟賑濟計口給籌凡五月而民始安臺司欲上其事
當得官而良知謝不願也忠介公崖異自好頗爲同
官所忌歿於官無子櫬莫能還好義者雖樂賻顧有
所畏憚無敢窺左足而先應良知憤然曰有官如此
忍使其骸骨不歸故土乎乃置醪中衢先以黃金十

金投焉三日得五百餘遂還葬於瓊良知卽發裝歸
山曰朱布衣從此遯矣所著有平倭志紀異錄留京
偶筆家訓三十六條弔忠介公詩載古今全史

翁叅字良預號春山蘓州府志云叅少讀書了大義不
樂爲博士業乃治裝遠遊客清源歲大疫死者相枕
叅買地郭外爲叢冢瘞之建東獄行祠卽其內延耆
宿訓誨閭里義聲震齊魯間旣歸吳郡守縣令聞其
名往往咨之以事吳獄隘不勝繫而宿囚黠悍輒凌
其新入者叅請廣獄室別處鬼薪以下而身任其費
嘉靖間海倭入寇已躡西洞庭叅出家財募鄉勇捍

禦東山賴以全守令賢之間諸臺使者旌其廬曾孫
彥博字約之爲人有才幹當鼎革時山中奸徒作亂
鄉里有焚劫之禍彥博倡率好義者殲其渠魁一山
始獲晏然有蒙師高某課徒過嚴一子遂至殞命彥
博弗介意復延師三年人復其長厚云事具錢謙益
所撰墓表

鄭庚字惟金性謹愿不趨時俗與人交不設町畦隆慶
間知縣劉應望委爲耆正多所建明免里之貧不堪
役者八十餘家嘗爲族人代輪轉漕北上所費出自
已橐不計也二兄析父遺產庚讓弗取族人爲鬻地

林屋民風 卷九
爭持者累年庚密償厥值而兩家怨釋鄰人秦某願
售所居庚不忍其去厚遺而却之其周急繼困性所
樂爲也孫元亨能詩著有一有吟

馮星字炯之束髮事游俠以膂力自雄先世所遺巨貲
咸散給族之貧者會倭警有寄帑千金者越三載始
來發篋授之封識宛然卽家人弗知也星涉學素寡
晚好誦讀坐臥一小樓曠懷弔古短章寄興萬曆間
巡按御史甘士价獎其義勞以粟帛年八十四而終
陸萬里字季鵬居碧螺峰下因自號碧螺生生長身慷
慨有膂力會勢宦辱諸生章某章萬里友也發憤仗

義助章宦銜之幾斃豪暴手單騎入都將擊登聞鼓
時撫按以其事聞乃止選貢入南雍中庚子試與吳
中名士倡七子社以文行相砥礪年五十二卒子樞
字公榮

本朝席本禎字寧侯端攀子本禎廣額豐頤具大人相
援例爲太學生事父母以孝稱有祖祠在翠峰歲時
上享會其宗人立義莊義塾爲文以記崇禎辛巳江
南大禎本禎捐八千金賑饑由吳以達旁郡多所全
活應撫黃公希憲以聞優旨褒獎予以官本禎以親
老固辭且上言願助國家討寇請輸所有以佐軍上

嘉其忠卽家授文華殿中書兼太僕寺少卿誥贈祖
父如其官副節使移封唐藩崎嶇兵間未及報命而
返時中原多故湖湄萑苻嘯聚本禎以全力彈壓地
方賴以少安卒年五十有五祀鄉賢祠吳偉業志其
墓子啓圖字文輿以例貢授中書舍人好施與行善
有才力其教東山人行紡織冗費悉出已橐期年而
業成至於樸死梁涉餒餒絮凍施惠於一鄉者無算
其歿也鄉人哭弔者盈門著有畜德錄行於世汪琬
志略云若舍人者可謂有德有言之君子也

貨殖

宋夏元富元豐間人生壙記云元富居洞庭之慈東里
爲一鄉著姓年十六賈於四方三十八而貲產豐積
於是治第宅置舟舫爲人好文嘗夢鳳集於簷蓮生
於庭明旦孿生二子遂小字曰鳳曰蓮鳳後名杲拜
忠翊大夫捲簾使蓮學佛於山之水月寺法名道原
見仙釋傳人以爲鳳蓮之應

明翁籩字文夫號少山東山人父叅見義俠傳申文定
時行誌略曰君少挾貲渡江踰淮客清源清源百貨
之湊河濟海岱間一都會也廼治邸四出臨九達招
徠四方賈人至者襁屬業蒸蒸起已察子弟僮僕有

心計強幹者指授方略以布縷青靛棉花貨賂往來
荆楚建業閩粵間甚至遼左江北聞其名非翁少山
布勿衣勿被於是南北轉轂無算海內有翁百萬之
稱同時許志問字冲宇善治產積居與時逐家累巨
萬即所居創大第至今言富者必稱翁許云

席端樊號左源端攀號右源亦以行賈起家富埒翁氏
翁衰而席始興兄弟學賈松江善治生年十七父卒
協力運籌策遣賓客子弟北走齊燕南走閩廣不二
十年貲累巨萬凡吳會之梭布荆襄之土靛往來車
轂無非席商人左右源者今子孫修業而息之善富

者一再世未已也東山自翁許貲雄席氏繼興子弟
多去文學而趨利

游寓

春秋范蠡字少伯楚宛三戶人蠡既雪會稽之恥乃乘
扁舟浮五湖居太湖之包山蘇州府志居洞庭東山
誤

宋孫覲字仲益晉陵人大觀三年進士覲自建炎初由
內閣出守平江未幾罷政慕郡西山水之勝泛舟濟
太湖登洞庭山日與詩僧韻士嘯傲於豐林邃壑間
頗有所得遂僑寓於山之陽名其舍為休寓室云

范朝宗字伯海能詩有巖栖集晚從釋氏卜居洞庭
李彌大字似矩郡人崇寧間進士嘗爲顯謨閣直學士
朝散郎遷尚書紹興二年出守平江蒞任不越歲而
罷游太湖登諸山築室於靈祐觀東名易老堂焉自
號無礙居士又有道隱園架雲亭彌大嘗自作記其
址尙存今林屋洞谷磨崖刻有李尙書無礙菴記
鄧若水字平仲蜀之井研人嘉靖間進士理宗卽位應
詔上封事語侵史彌遠以格當改官爲彌遠所抑不
復仕進隱太湖之洞庭山賈似道在京聞其名辟叅
軍事若水雅思其鄉乃起從其招由是歸蜀

錢豫字康功郡人宣和初舉進士通判楊黃滁三州官
至朝奉大夫建炎中避地東山社下里築雙清亭
明路振飛字見白號皓月廣平曲周人天啓乙丑進士
母袁氏夢虎入室而生振飛廣額豐下尚論古人以
范希文文履善自許由涇陽令行取監察御史極論
宰輔冢宰某某等誤國狀皆人莫敢指者朝右翕然
出按福建再按蘇松條上布解白糧漕兌櫃收差役
五弊父老嘆周文襄再生也崇禎癸未由光祿少卿
擢都察院右副都御史總督漕運闖賊渡河陷晉振
飛以全力捍淮擒叛人呂弼周武愨而忌之者滋甚

用田仰代振飛旋奉母諱道梗僦居東山時三吳鼎沸山中一日數十驚賴振飛以少安後卒於粵贈太傅諡文貞返葬於東山法海塢錢謙益撰神道碑銘有云洞庭新宮夫椒舊壤忠魂正骨薶此陳莽其子孫守冢居山中

列女

宋王氏靖康間人居洞庭之消夏灣年七歲有奇才作宮詞七百首傳播四海高宗南渡建都錢塘聞其名使納爲妃氏對使者曰二帝未還敵邦未殄便志曷樂英主諒不出此使者去卽飾衣妝拜父母曰女死

大人無遺憂矣卽入房闔戶自經遺書於儿上曰以此復爾主少頃果有緹騎來見已死卽以詩復命高宗感泣下詔贈之爲貞烈夫人

李玉中稗聚

明馬氏沈墳之妻馬良之女墳亡孀居三十五年固守節義終身不改適

夏氏山陽人蔡仲彬妻仲彬商於淮陰娶夏氏女甚孝且賢夫亡年方二十哀毀盡禮終不改適郡縣以聞永樂間旌其門

蔡氏名妙寧消夏灣蔡仲簡女徐襄妻也洪武末氏年三十夫亡守節撫子義成立娶馬行景之女年二十

木犀長風 卷九
餘義亦卒馬守節終身克紹姑志鄉黨以姑婦咸有節操名其居爲雙節堂

馬氏沈鎮之妻馬林之女年二十七而孀居堅心守節事姑甘旨湯藥奉養無違歷三十二載如一日

徐氏文敏公姪女東陽里沈成德妻事後姑至孝年二十三成德旅死遺孤三人依依襁褓家徒壁立棲一斗室風雨不蔽泝泝統以支體粥指手龜裂日一飯不再餐勉令子讀書三孤皆成立長子蓋臣舉孝廉歷官鞏昌府同知氏守節五十五年卒年七十五

徐氏沈應禮妻父鳳池伯鳳岡俱以義俠稱於鄉里氏

年十有七歸于沈生子懋孝懋思而應禮卒氏時年二十七壽八十七而終氏生而端淑不苟言笑事有拂意不形於色夫旣死語戚媼曰從一而終分也况藐諸孤在可恃以自固事吾舅姑訓吾子所以卒事吾夫也後子讀書能文試不利氏慰勉之曰立身行已儒者事也盡若事而已遇不遇命也夫何憾其識見明達如此

鄧氏慈里王爾思妻維德祖妣也祖妣年二十四生我父正方伯正雅而皇祖亡家貧窘飲食不給祖妣矢志守節夜然燈紡績每至達旦後歲數大饑日一粥

不繼艱苦備嘗撫孤成立伯正雅娶蘇氏年十九成
婚一載正雅公亦歿無出伯母慟幾絕兩目皆瞽終
身衣麻茹素克紹祖妣貞操祖妣年七十一伯母年
五十九而卒會家貧無力不克請旌

范氏消夏灣嚴士元婦也氏家楚沔之拖船埠士元父
子忠商於沔聘氏爲養媳年十二挈歸洞庭已士元
復從父游楚貲盡流落竟死不歸氏性孝事姑弗怠
姑憐之欲令更適曰吾有夫將安適乎後有人傳士
元更娶者因勸改嫁曰吾有姑將誰養乎旣士元物
故姑以天年終鄰里俱勸其改嫁曰吾老矣敢自辱

乎家貧業鍼繭給姑飲膳晚年奉事金仙不肉食年
八十有三以處子終其身焉

金氏後堡蔣二樓祖母也氏年二十而夫死生子尚未
一年氏苦志守義撫子成人娶婦張氏張年十八夫
亦死生二樓亦未一年也兩孀婦同室而寢辟繡以
支饘粥張事姑甚孝姑病氏湯藥旬月無難色二樓
長事祖母與母亦孝金年八十張年七十五以壽卒
蔣氏卽蔣二樓女也適舟里鄭懋思明季山中盜大劫
二樓家遇盜盜與二樓仇氏歸寧適盜至二樓出奔
盜劫其貲而火其家將以沔氏焉氏遁走盜逐之窘

本朝陸氏字鎮下沈凌谷子未成婚夫死父母欲改字
之氏哭泣不願父母屢諷之氏必不願乃止祝髮焚
修獨居一室足不履外戶事父母尤孝卒於康熙九
年年七十

陸氏涵村人鎮下沈維揚妻維揚賈於楚爲賊殺死氏
年二十一訃至痛不欲生幾死者數矣夫兄曲論求

宗人之子立以爲後乃止家無餘財紡績自給嗣子
成人業賈養母至孝氏年八十六卒嗣子名鍾英字
簡生

戚氏東蔡里蔡士賢妻士賢病久氏竭力醫禳奩貲盡
傾疾革且死子亢宗在襁褓士賢屢顧之氏泣曰君
恐我他適故不忘此子耶嚙斷左食指以誓士賢死
氏年二十一舅欲奪其志氏曰吾所以不死者以藐
諸孤在也奈何以非義迫我引刀裂其面示不可奪
家貧力紉綴紡織自給後饑饉薦至家道益落日一
飯不給人所能堪氏獨處之泰然夜然火紡績撫

子成人娶吳氏子婦皆極孝營甘旨以養母母偶有拂意子與婦必長跽而請俟歡欣乃起氏年七十二卒時康熙四十四年正月亢宗至今述之未嘗不嗚咽流涕也

沈氏沈君璧女徐洪載妻年二十八無子夫病劇氏不梳櫛奉侍湯藥浹月不解衣帶夫憐之易簣爲囑之曰汝年少無子守節非計之得也氏泣不應夫死有以改嫁諷者氏引刀破其面曰寧死無顏對他姓子也聞者俱爲泣下孀居五十餘年卒

王氏明灣黃子嘉妻氏年十六成婚三月有身子嘉行

賈粵東旅死生子謙益家貧衣食不能給夫兄元錫憐其志爲稱貸以周之子成立奉養無違氏年八十八

陶氏郡人適石公王炳文結褵四月夫死氏有身兩月矢志靡他生子政安教訓有方居家遠尼媪布衣蔬食澹泊自甘每食必設位祭其夫侍坐祝曰妻在此汝疆飯嗚咽流涕至老不改鄉人哀之年七十有六蔡氏圻村人父野亭母王氏野亭遭篤疾死時氏在娠甫六月母氏苦志守義以貞節聞氏年未二十適同里秦公茂生子縻公茂有楚游歸未一月虐疾死氏

年二十二痛不欲生姻黨以藐孤幼慰勉之乃長齋
布衣一如其母康熙三十年七月卒年五十一母子
皆以貞節聞

蘇氏慈里張靖侯母也氏年二十四夫死誓不復嫁撫
孤食貧守節五十餘年年七十八卒

徐氏新村灣殷爾仁妻也父養初養初多病氏年十四
事父以孝聞適爾仁爾仁死氏時二十三歲生子啓
旭終身衣麻茹素足未嘗出外戶啓旭成立事母亦
孝鄉里多稱焉

朱多姐慈里朱顯甫女年二十字徐某未娶顯甫農家

子貧甚兇徒鄭紹甫欺之紹甫者里中亡命也父子
橫行平民畏之如虎狼一日入女寢欲亂之女佯許
期其夜來鄭去女泣曰不從禍及父母從則何以爲
人也遂自經死親族皆畏鄭之惡莫敢言殯時顏色
如生里人述之凜凜也越四年紹甫梯牆忽墜專呼
服謝罪謂妻曰朱多姐同卒數十輩共至欲殺我矣
言訖嘔血死少頃妻亦呼服相繼死時人咸以爲快
女死在康熙三十五年四月鄭死在三十九年七月
後十餘年紹甫子鄭三惡極被仇人殺死

烈婦黃氏兵場里人丐者胡某妻也夫死舅姑以其年

少無出欲奪其志諷之再三氏哭泣不從夫弟私納人聘迎娶至門氏佯歡欣整嫁衣入寢室堅閉久之寂然羣壞戶入氏已經於榻時康熙三十六年秋山中人遠近致奠文人爲作記傳沈宰公繼室張氏才女也作輓黃烈婦序以悲之

徐氏山東里莫某妻年二十而夫死無出夫族以其貧窘莫肯嗣氏獨居紡績操守凜然守節五十年鄉里不識其面康熙辛卯中秋夜卒年六十六

胡氏郡人胡賓侯女適東蔡里蔡丕顯年二十八而孀居氏遂守志不渝易釵珥勤紡織以自給歷三十餘

年如一日

倪氏龜山倪元明女年十七嫁頭啣橋金仲元子仲元淹楚不歸氏以不得奉侍成婚四月促夫往求抵武昌旅病死焉遺腹生子瞻郎氏遂盡易其釵珥衣服挈孤與同母兄至楚遍求其翁及夫骸骨歸翁老病氏力事織紵朝夕奉養無違後三十年宰邑者以節孝獎其室氏謝曰此吾分也何以獎爲峻却不受郡守陳公聞而歎曰安得此賢節婦乎賦詩贈之

葉氏前灣葉長卿之妹渡渚朱某妻年二十五生子瑞林四歲而孤葉誓不復嫁勤劬勞績以立門戶守節

四十餘年無二志

王氏石公里人歸圻村蔡某年十九生子文升未逾月而夫病革王瀝血露禱十晝夜目不交睫既死傾奩資以支殯費事姑撫子矢志靡他或以言餽之輒怒曰從一而終分也忍以身爲兩家婦耶家貧女紅自給教子有義方卒年四十一

王氏慈東里王善問女適舟里鄭寅錫子年二十四夫天亡氏布衣蔬食日挫鍼以支饋粥事舅姑甚孝先意承志啜菽飲水盡其歡

以上洞庭山

明葉氏蔣灣葉顯宗女年二十嫁俞塢曹順未幾順死

旅邸舅姑欲改嫁之不從舅必欲嫁之一夕自縊于簷下翌日其夫骸骨適歸遂合葬時景泰四年六月葉氏幼有志操聘於周氏周氏子無行葉泣曰忍以此身自污耶誓死不與成禮久之周氏子死父母欲嫁之又泣曰忍以一身許二姓耶欲自引決乃止祝髮爲尼去往寒山菴又賀氏聘於張氏將成禮矣其夫忽卒訃聞其家欲止賀曰我已心許之矣禮不可不成遂盛服以往及其門易衰服撫棺哭之慟持喪三年終不肯歸久之亦祝髮爲尼於寒山菴二人自力衣食成行凜然其下皆戒勅精潔皆八十餘終

王妙鳳許嫁吳奎奎母有汚行女穢之不肯行父母喻以百方不得已往姑自若也奎嘗商于外妙鳳獨與姑居一日姑與所私飲命氏溫酒氏從爨室舉燎火警之其人入爨室戲紵其臂因大哭曰我此臂亦爲人所汙耶遂引刀斷之終亦不明其姑之惡也逾旬卒年二十六後里人白于縣縣鯁姑婦之議寃不獲伸

徐氏廣西桂林中衛千戶徐光女吳孟實妻孟實從兄孟仁官桂林因娶年二十七生子聰二歲而孤守節不嫁經理家務有法教子勤劬不輒

金氏歸賀元吉元吉早亡遂守志不易或以言諷之輒怒曰安有士夫家婦而再嫁者乎事姑尤孝王文恪鑿謂寡居而孝尤所難也

葉氏適閩門朱綸綸商海外溺海死焉葉誓不再嫁事姑撫子未幾子復死父曰無依矣將歸之于家不可乃求宗人之子立以爲後力事紡織以給終不改適曹氏張孟舉妻年二十二孟舉夭亡父母欲奪其志氏引刀斷去食指曰矢不捨他姓物矣孀居四十五年奉孀姑金氏同室而寢弘治十七年姑年九十卒氏旦暮號慟哀毀成疾不久亦卒翰林吳文之有詩弔

之

吳氏洞庭山人東山賀元良妻嘉靖初旌表

俞氏吳縣庠生顧春妻嘉靖間旌表

葉氏嵩下人慎廣鈺妻嘉靖末旌表

朱氏翁希姚妻年十六歸翁未期希姚客死無出室如
懸磬氏力紉綴紡織養孀姑周氏姑病侍湯藥浹月
不梳櫛不釋衣帶調護備至後失火焚其廬明年盜
夜劫掠又明年復被劫饑寒困苦人所不能堪而泰
姑之禮如初每夜然燈火紡績達旦以致之族人稱
其節孝

堵氏馬跡山人適李祐未期年父翰往視之因挈歸寧
舟過湖父墮水人莫能救氏躍入水救父不得而死
事在正德十二年

葉氏年及笄未字父母相繼歿弟沆方在襁褓人勸之
嫁指其弟曰痛失怙恃寧忍舍之而去耶稍長議之
及沆成童人又勸之復荅曰俟成立議之及沆旣冠
婚畢宗黨咸曰昔爾父奄棄宗祀伶仃賴爾貞孝撫
弟成立弟旣婚矣今當爲爾議姻事乃笑曰豈有少
而不嫁老反嫁人者乎終身未嘗出外戶及其歿也
弟沆喪之三年嘉靖中郡守姜公旌其門曰貞義云

周氏年十九適曹憲輅越二年憲輅病羸竭力醫禳盡
傾奩貲歷五年憲輅病篤囑其兄善爲妻身後計氏
泣謝誓不獨生踰日憲輅卒氏從容爲夫沐尸易衣
并衣已衣周身密縫之縊于夫側明日兄來叩門寂
不聞聲破扉入則二尸在焉時崇禎戊寅正月

周氏吳安忠妻年十六歸安忠越九年安忠卒遺腹生
一子氏善撫之家貧無業日挫鍼以給事姑至孝訓
子有義方中年鄰家失火焚其居僅存一室人罕見
其面子天又撫其孤孫儉勤淑慎年八十一而卒

鄭氏翁枝禱之妻年二十四枝禱卒氏布衣蔬食足不

出戶居家遠尼媪絕巫覡事舅姑孝卒年五十九

劉氏嚴林妻崇禎七年旌表

翁氏許明臣妻崇禎十年旌表

嚴氏張頗妻崇禎十三年旌表

賀氏嚴士驄妻士驄之父若愚以諸生遊魯爲魯國主
教授隨父家於郟城馬頭集崇禎辛巳流賊攻郟城
大掠馬頭集士驄負幼子出奔賊入其家將掠賀氏
以去氏以死拒之賊使所掠鄰媪與婦善者以語誘
之氏怒曰汝喪廉耻從賊更欲汙我耶賊露刃逼之
氏大罵遂見殺一女亦遇害

本朝馬氏年十七適周文遂越五年文遂病且死屢顧
氏氏曰君不我忘恐我他適也以刀斷左手一指爲
誓文遂死居二年姑歿服除始歸寧父母以其年少
無出欲奪其志婉言諷之再三氏哭泣欲死家人多
防伺之氏佯歡笑如常且整嫁衣防伺遂懈夜半自
經死衣袂肅然氏生于崇禎己卯死時年二十六
周氏年十六嫁葉嬰暉結褵一月嬰暉行賈松江逾年
以疾卒訃至氏遂自經死山人醵金致奠遠近雲
集又吳氏女許嫁于葉葉氏子病羸媒妁度其必死
謂吳父母曰葉氏子疾革矣盍爲爾女更擇所歸乎

吳聞之自縊于寢室吳死在戊申八月周死在己酉
十月

陳氏年二十適嚴信任二十六而信任死乳哺孤兒不
三載子復殤氏日夜翼其翁之葬其夫凡七年而後
葬家貧惟以女紅自給未葬卽檢諸爲人刺繡者歸
之自製附身服物皆整辦葬之三日往奠于墓哭盡
哀歸而於其夜自經死

金氏吳縣庠生吳之翰妻康熙二十三年旌表

以上東山

明劉氏山東泰安州人馬跡山史彥妻永樂二年旌表
錢氏迎春鄉人年十六歸里人姚冕生一女成化十九

年冕客死柩還氏迎哭舟次赴水以殉親族援救之
服闋夫兄私納人聘氏覺之投于池復救甦家人防
之甚密知不免乃佯許之防少懈一日薄暮浙米釜
中謂女曰汝蒸火吾少睡糜成報我比女往見寢室
堅閉叩而啼哭衆驚壞戶入氏縊於榻以家貧闕旌
典

丁氏丁致寧女適同里孟文學生一子曰恩孟客死于
汴氏年二十二撫孤食貧爲子娶婦旣而子又早卒
撫其孤孫年八十終嘉靖間里人王邦憲白諸當道
獎曰貞節

本朝周氏丁志臯妻明季僦居江陰鼎革時兵至志臯
挈氏匿田間兵執志臯刃之氏號哭以身蔽志臯兵
挾之起則抱持愈固怒而殺之至死猶不解兵去志
臯卒得生 以上馬跡山

明周氏適武山葛承瑾承瑾旅死臨清氏年二十七遺
孤之畏甫七齡伯氏皆早亡上世纍纍十棺俱未葬
氏力事織紝竭盡勞瘁以撫孤成立命之畏營葬遺
棺卒年七十三

吳氏席時龍妻崇禎十二年旌表

本朝張氏吳嘉論妻康熙二十二年旌表

以上武山

本朝朱氏長沙山謝爾長母年十九夫死遺腹生子爾
長舅姑以家貧力逼改嫁朱誓死不從撫孤食貧終
身勤劬不輒守節五十四年卒爾長請諸當事獎其
室

姚氏年二十嫁同里紀某後九年氏有身四月夫死生
子克榮親族無一倚恃之人煢煢子立衣不蔽體日
食不再餐撫孤成立飢寒困苦三十餘年年六十卒
孝婦顧氏王瑞昭妻瑞昭早亡氏守節不嫁事後姑甚
孝姑病三年奉侍湯藥隆冬盛暑晝夜不寐姑復病
痢年餘氏竭力醫禳鞠躬盡瘁生養死葬之事罔弗

盡禮焉又郁士鯉妻陸氏年二十九夫死家貧窘矢
志守節事姑尤孝棲一斗室中風雨不蔽與孀姑同
室而寢勤勞紡績以支餽粥鄉里俱以節孝稱之無
間

以上長沙山

韓氏橫山韓茂槐女適同里王某結褵兩月夫旅死西
蜀氏誓不再嫁盡出其貲財產業散給于夫族之窘
急者守節六十餘年終不改適

林屋民風卷九終



